

Marius Boyer

Lei conte de Bougneto



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

Marius Boyer

Li Conte de Bougneto

**Imprimerie Béné
Nîmes - 1976**

PREFÀCI

Lou vièi aubras de nosto civilisacioun, emai aguèsse tant pourta frucho, èro à mand de peri, aubourant sus la mountagno si brancasso toursegudo desenant esterlo.

Venguè pièi lou miracle.

Dins li piado dóu Maianen, vaqui que di darriés aglan espeliguèron de gréu pourtaire de l'espèr d'uno raço renadivo.

Mai lou fau bèn dire, franc dis obro di grand, la majo part dis aglanié vènon anequeli dis annado de secaresso esperitualo.

Obro de letru, eissido dins la sournuro de si gabinet, la literaturo prouvençalo de vuei, s'es richo dóu merite de la mantenènço a perdu soun naturau, sa sabo, sa frescour, soun espountanita.

Es vengudo l'obro d'artisto biaissu pèr escriéure de vers o escrincela de sounet. Pamens, i'a plus gaire d'oubrié engaubia pèr retraire la vido de cade jour, umblo e atrivanto que retipo l'ome de pèr lou rouman, lou conte o la nouvello.

Vaquí perqué «Bougneto» a quaucarèn à dire.

Aquel Aubagnen es pèr nautre un di darrié sagatoun espeli di racino de l'aglanié, riche e pouderous de la memo sabo que l'aubras que lou buto e l'empuro.

La richesso de Bougneto es justamen d'agué ges de pretencioun literàri: es un di darrié de teni sa lengo dóu pedas.

Em' acò, tout simplamen, sènco artifice, aquéu fiéu de païsan e de bouscatié, raconto çò que i'a tira l'uei, çò qu'a ama, çò que lou faguè soufri, çò que lou faguè rire!

Lou soulet liame engarbant si raconte es un inmense amour de sa Prouvènço, de sa vilo d'Aubagno, de soun brès escoundu dins la valèio de Sant-Pouns.

Dins un tèms que li frucho espelido de la civilisation an plus ni goust ni gousto, es pas souvènt qu'avèn la fourtuno de moussigna dins uno poumeto fèro eissido sus li pendis de la Santo-Baumo.

Nautre, se n'en sian cungousta...

André ARIES.

VAQUI " BOUGNETO "

Perdequé mi dien «Bougneto»? Vous vau va dire se voulès.

A la creacien de nouesto «Escandihado», fuguèri carga de faire uno pichoto counferènci-charradisso sus meis ourigino e sus lou terraire miéu.

Coume resista à la preguiero de sòci tant gentieu? Mai sabiéu pas, paure de iéu, ounte anavo mi mena uno talo counfessien! En fin, aro lou vin es tira, fau lou béure, coume si dis, e aurai eirita d'un escais-noum de mai.

Aviéu coumença 'nsin ma dicho.

Siéu nascu en pleno miejo-caremo que segound la tradicien dins chasco famiho si manjo lei bougneto.

Vous apprendrai rèn en vous diant que si fan emé de farino dei mai blanco mesclado emé d'aigo de flour d'arangié e un rous d'iòu, puei em' un cuié jita dins l'oli bouiènt.

Mai restèn dins noueste sujet.

Aquéu que fuguè moun paire, èro carga de faire lei bougneto pèr sa gènto mouié, car aquelo, si vesié proun dóu resto, esperavo un «urous evenimen», e siégue pèr li evita de fatigo o pèr li faire plesi, èro éu qu'avié pasta la farino e que fasié fregi lei bougneto.

Parèis que l'avié uno boueno óudour d'òli fregi dins la cousins, mai pas pulèu sourtido de la sartan e saupicado de sucre fin, qu'elo lei brifavo.

Dempièi un moumen acò duravo; éu li fasié joio de la vèire ansin manja, meme se d'aquéu fa n'en poudié tasta, mai li tiravo proun peno que li faguèsson mau tambèn, subretout dins soun estat

Un coup li faguè:

— Digo, Talio! as pas pòu que ti fagon mau tant de bougneto? e elo respoundiguè:

— Es verai que n'ai foueço manja, mai soun talamen boueno que pouèdi pas mi reteni, vè! aquelei que vènon saran pèr tu!

Ah! vouato, vai ti faire vèire! éu, n'en manjè doues e elo quatre!

Em' acò éu li fa:

— Talio! vai d'aise, li vas un pau fouart van ti faire mau!

— Tè, vè, encaro doues e m'arrèsti, tè encaro aquelo, tè plus qu'uno.

E parèis qu'acò à dura encaro un long moumen, jusqu'à n'aguè lou bòumi, autambèn que fuguè óublijado de si metre au lié em' uno febre à noun plus e de manda querre lou medecin, seguro d'agué uno indigestien de bougneto.

Quand fuguè aqui, faguè coume Saloumoun, rendiguè sa sentènci, en regardant moun paire, li fa:

— Es pas iéu que fau dins aquéu cas, es l'acoucharello, Moussu!

E vaqui! luego d'uno indigestien de bougneto es iéu que siéu vengu sus la terro e que mi dien «Boyer dei Bougneto».

Poudien autambèn mi trata de Carnava dóu moumen que li èron!

ESTRÀNGI DECLARACIOUN

Fuguè un tèms au siècle passa, au founs de la coumbo de Sant-Pouns, mounte li dison «Li Toumpino», l'avié uno grando fabrico de papié.

A l'ouro de vuei, aquelo usino es qu'uno rouino mai poudès encaro vèire lou passàgi de la grosso rodo d'aigo que lou riéu «lou Fauge» en la fènt vira, fasié founcoiuna tutto l'usino.

Quand la malancounié me prèn, vau eilabas medita, pièi gançaia de souveni que pamens soun pas li miéu; mai sabe qu'aquelei qu'ai ama, an viscu aqui! an pati! an espera!

Aquesto fabrico èro se voulès l'escouladou di gràndi ciéuta coumo Aubagno e subretout Marsiho.

Escouladou en estrasso e vièi papié que lis estrassaire en fasien la cuièto.

De moun tèms, quant de cop ai vist de pàuri gus faire li mouloun de bourdiho, pèr rabaia un tros de vièi journau, vo de papié de boucharié e d'autro meno!

Li vièi papié e estrasso èron croumpa pèr d'estrassaire de mèstié que n'en fasien de balot e que mandavon à n aquesto entrepresso de Sant-Pouns.

Partènt d'aqui se fasié un triage, estrasso d'un caire papié de l'autre, pièi à cha-pau tout acò èro mès dins un ban, espòuti, trata, e n'en fasien de papié nou.

Pèr faire lou triage d'aquesto meno i'avié un ome rude, gaire coumunicatiéu, un cachimbau à la bouco, lou péu de la tèsto que vesí jamai lou penche, mau rasa; mai quel ome fasié soun obro sènsa jamai reguigna, rèn lou rebutavo coume travai. Pròchi d'eu soun chin, tout clafi de rougno e quasimen sènsa péu. Quau èro lou plus miseraIe di dous?

Mai Louèi, li disien Louèi, avié quaucarèn dins sa pauro tèsto, e tau un verme

amourous d'uno estello. Louèi dous còup la semano, vesié passa uno bello fiho, emé de grands uei blu, drecho coumo un I que s'en anavo vers Gèmo.

Qu'èro aquesto dameisello tant poulido?

Ero uno umblo servicialo dóu Couvènt de Betanò dóu Plan d'Aup. Voulié, elo tambèn, intra coumo moungeto, mai sabe pas perqué acò li fuguè refusa.

Ero aussi la fiho d'aquéli bouscatié que s'ausissien de liuen e qu'abatien li roure pèr n'en faire de carboun, que fasien éli même dins lou bos.

O! èro la chato e la souero di bouscatié, carbounié e tambèn bracounié qu'èron!

Ounte anavo coume acò?

Tout simplamen querre lou pan de la coumunauta au fournié de Gèmo!

D'aqueste tèms, i'avié ges d'automobile! Ges de fournié au Plan d'Aup! O, anavo cerca lou pan dins uno saco, que li faudrié pourta jusqu'au couvènt per li draio que menon i glaciero e au coulet de Bartagno.

Quand soun pan èro dins la saco, agantavo lou draiòu e escalavo devers la Santo-Baumo!

Soun cor li batié proun la chamado, la sèuvo èro fourrido, sabié qu'anavo mai lou vèire, éu! Acò mancavo pas! Just! èro mai aqui à quauqui pas darrié elo! Louèi! l'ome que li fasié pòu! e de mai avié soun fusié sus l'espalo! Soun chin galous, que tremoulavo de longo, semblavo estaca à si pas.

Degun disié rèn, noun rèn! ges de mot, nimai de gèste inutile. Un soulet but: Marcha! un seguènt l'autre e d'uno souleto estirado! de Gèmo fin qu'i glaciero, car aqui anavo feni lou calvàri d'elo e lou raive d'éu!

O! aqui fenirié l'aventuro, perqué aqui l'avié lou paire! aqui l'avié lou fraire! alor se passavo la scèno ansin: elo li cridavo: «Anas-vous-en! grand marco-mau! vias pas que me fasès pòu! maufatan que sias! semblas un bandit emé voste fusié! cride moun paire, se partès pas lèu!»

Alor lou paure Louèi, mutavo rèn, e tristamen, bèn tristamen, reprenié la draio e redescendié à sa fabrico de papié emé soun paure chin toujour darrié. Acò durè long-tèms, long-tèms; sabié bèn éu que, tres jour après, la même scenasso recoumençarié. Acò mancavo pas. Coumo la vesié, Louèi, siblavo soun chin, prenié soun fusié e zóu mai darrié!

Aquesto vido, noun poudié s'eternisa e un bèu jour fuguè lou dramo!

Coume li fès precedènto, Louèi avié segui la bello chatouno, toujour quauqui pas en arrié, respetousamen fuguè la mountado devers li glaciero.

E coumo à l'abitudo, ges de paraulo, rèn. Quand arribèron à l'endavans de l'abrivado, la chato se tournè mai vers l'ome e lou foudrejant d'un regard li diguè:

— Entournas-vous de mounte venès! Maufatan que sias! Me fès pòu! Vé cride moun paire autant lèu!

Mai alor lou vis que sourris, emé nargo e coumprenguè qu'èro perdudo.

Louèi sabié que lou paire e lou fraire èron pus aqui! Sabié, lou bastard, qu'èron ana faire uno coup de bos à n'un autre endré.

Elo va sabié proun bèn, mai se cresíé que Louèi l'ignouravo! Soun astuci avié fa chi! Lou diéu de l'amour èro pèr éu! Adounc èro lou moumen vo jamai d'en prouficha!

Louèi, en bèn la regardant dins leis uei, prenguè soun fusiéu dins la man e li faguè aquesto estrangi declaracioun d'amour:

— Adèlo! t'ai jamai adreissa la paraulo! t'ai jamai rèn di m'as toujour insoulenta! mai vuei, fau qu'acò chanje! ieu t'ame à n'en mourir! Dounc vaqui! Viés moun fusiéu! Eh bèn, se volés pas de ieu... tue... Gaïeto!...

Gaïeto èro lou marrit chin! Afrous, pela. plen de mau! mai lou fidèu coumpañ d'aquel autre malurous que li disien Louèi.

Alor bessai pèr la pieta d'un animau, tant leidas qu'èro, vo pieta de l'ome tant pacient, dounè soun coundiment pèr soun maridàgi, que se faguè plus tard.

Pode vous afouri la verita d'aquéu raconte, la provo es que se siéu sus la terro es que ma maire-grand me l'a counta, qu'Adèlo èro elo, e Louèi es esta moun grand!

Vias! ounte vous meno l'amour de la naturo, pèr fès!

Emé de gènt ansin, voules pas qu'ame la Prouvènço, après acò!

LOU CANTOUNIÉ

Mi souvendrai toujour d'un de meis aujòu, de tras l'istòri que m'a counta moun paire, que soun paire l'avié counta à n'éu e que venié de plus liuench encaro.

Aquest aujòu èro cantounié, coume foueço lou fuguèron dins ma famiho, dóu caire paternau.

Un jour dóu debut dóu siècle passa travaiavo sus la routo de Touloun, mounte li dison «Coulin». L'endré èro desert. Lei routo èron gaire trevadisso en aquéu tèms. Lei gènt vouiajavon quasimen jamai en aquelo pountanado. Uno fès pèr jour passavo la diligènci de Cujo. Soulamen lei richas e lei negoucien si desplaçavon, pèr fès meme, passavo un cavalié; justamen l'istòri que vau vous counta es uno istòri de cavalié.

Adounc dempièi l'aubo, noueste brave cantounié èro à soun oubràgi, netejavo lei valat que l'avié de chasque coustat dóu camin. Avié pèr faire acò un magau em' uno palo: coupavo l'erbo e n'en fasié de pichot mouloun que levarié en fin de journado emé la barioto pèr lei pourta dins leis embut. Embut naturau que si troubavon alor dins lei palun e que m'an di gagnavon la mar, à Port-Miéu pròchi de Cassis.

A soun caire soun vièi chin bastard que li disié Foleto, à sa bouco, sa pipo (à mèns que l'aguèsse dins la man!)

Au luenchen, venènt d'Aubagno, un lougié niué de pòusso anounciavo la vengudo d'un cavalié. En efèt un moumen après un chivau au galop, mounta pèr un fricaud cavalié, passè à founs de trin en eigrejant un niué de pòusso blanco.

Ges de signe en passant, deguno salutacien, rèn!

Qu'èro sobre-tout, éu? un moudeste cantounié auprès d'aqueu segnour que venié de passa tant lèu!

— As vist aqueu, Foleto? Avié l'èr pressa! Dèu si langui d'arriba!... Hòu! mai qu'es acò qu'a toumba? A bèn toumba quaucarèn? Oh Bouan-Diéu, regardo- me 'cò: à perdu sa biasso! Regardo un pau, l'avié près pèr un segnour emé soun bèu vèsti, es qu'un mestre d'escolo, soun bagàgi s'es durbi, a perdu toutei seis imàgi.

Lou brave cantounié si metè à rabaia tout aquelei papié esparpaia sus la routo, lei remetegùe dins aqueu sa dubert tant malancounrousamen toumba, e anè lou metre souto la barioto mounte l'avié soun vèsti à n'éu, puèi si faguè un devé de bourra sa pipo e de

l'aluma ‘mé soun bate-fue amadou. S’escupiguè dins lei man, reprenguè soun óutis e taio que taiaras lei marrìdis erbo.

Pensavo plus à rèn qu’à soun travai qu’avié reprès despuèi pas mau de tèms, quand tournamai en dreissant la tèsto viguè un niéu de pousso, pèr l’èr au luen, mai aquesto fes venié de Cujo. Lou cantounié faguè:

— L’a bèn de mounde vuei sus lei routh!

Ero mai un cavalié, vo, belèu lou meme de tout escas. Ralentiguè soun anamen e s’adreissant au cantounié li diguè:

— Brave ome! aurias pas trouba uno saqueto pèr asard, l’avié sus ma sello en partènt de Marsiho e l’ai perdudo?

— Vouesto saqueto es aqui, coume sias passa adès, l’avès toumbado, ai coumprès qu’èro d’imàgi pèr lei pichot: tenès moussu, vaqui voueste sa!

Lou Moussu sènso muta, prenguè lou sa, si l’estaquè au vèntre, emé sa centuro, puèi ‘mé seis estriéu pougnè soun chivau e... I... Cocoto!

— Tè, Foleto! aquelo empègo! Pèr eisèmple, m’a pas meme di merci! Li fa rèn, dèu pas l’agué pensa, pressa coume èro! E lou cantounié reprenguè encaro un cop soun óutis en parlant à soun vièi chin e en tirant de boufado de sa marrido pipò.

Au bout d’un moumen, de nouvèu un niéu de pousso, venènt mai de Cujo e pèr pas chanja, lou meme cavalié. Lou cantounié si dis:

— A mai perdu sa sacocco? Aqueste cop, l’ai pas troubado!

Lou cavalié arrestè soun chivau cubert d’escumo, d’uno man tirè sus la brido, e de l’autro man tendiguè quaucarèn à l’ome en diguènt:

— Cantounié! acò es pèr vous!

E li dounè uno pèço de dous sòu en brounze.

Aquéu, tout espanta, regardo la pèço, regardo lou cavalié e demandè:

— Perdequé mi dounas acò? Moussu!

E l’autre li respond subran:

— Acò es pèr ana vous croumpa uno cordo pèr vous ana pèndre!

Noto de l'autour : Davans la niaisarié d'aqueste aujòu qu'avié pas recouneigu de biheto de banco que lou sa n'èro plèn (n'avié sènsò doute jamai vist) lou cavalié à pas pouscu s'empacha de lou fouita d'aquesto fraso.

M'an reproucha aussi d'aguè mès uno finalo brutal ! Mai noun ! chanjarai pas un mot, estènt qu'aquesto istòri es puramen vertadiero, e nouesti rèire nous l'an servido qu'erian encaro dins la bresso.

Pèr iéu, s'arrestara eiçi, sènsò descendènçi masclo vous demandi un pau en quau pourrié fisa aquéu secrèt de famiho !

LEI LUNETO DÓU PAPET

En aqueste tèms, nouesto boueno vilo d'Aubagno vivié en periodo de guerro, pas 'quelo de 39-45 que l'an dicho la «drolo de guerro», noun ! mai aquelo que lei vièi l'an noumado «la Grando guerro».

Aubagno avié alor coume Conse lou paure farmacian Jousè Lafond. Diéu paure, car cadun saup qu'aqueste conse avié la peniblo missien d'ana anouncia, chasque cop ei famiho, la mouart sus lou front de soun fiéu vo de soun ome. Avié jamai vougu que degun lou ramplacèsse pèr faire acò. S'en fasié un devé persounau.

La poupoplacién d'Aubagno, alor, despassavo que de gaire lei nòu milo amo, coumprès aquélei qu'èron eila-bas, vo que pecaire si noum figuron sus lei lauvo de marbre dóu mounumen dei mouart dóu cous Legrand, vo d'aquéu dóu cementèri

L'ativeta de nouesto pichouno vilo èro mai que ralentido d'aquéu fa, e vuei vous vouèli parla de l'istòri d'un de seis enfant.

Ero un moudeste emplega municipau, que li disien Louèi lou fountanié, pèr que s'óucupavo de tòutei lei fouent d'Aubagno.

L'avié que cinq vo sièis emplega dins touto la coumuno. Mi li rapèli tòutei.

Moustier, l'ancian navigaire, qu'escoubavo lei carriero dóu matin au souar.

Douminique que menavo lou toumbarèu dei bourdiho e que fuguè sagata dins uno fèsto. Avien tòutei begu, lou butèron dins lou pous d'un santounié de la carriero Laget.

Chouas Demaria, qu'èro lou massoun de la coumuno.

Jan-Pau Peisse, que sa femo tenié uno especiarie.

Long-Tatèu, de Garlaban que s'èro marida que cinqantenejavo.

Emai, lou chèfe: Bosq, pèr surviha tout acò.

Louèi, trabaiau sènso relàmbi de la pouncho dóu jour à la niue toumbado. En mai de soun emplé à la coumuno fasié de travai de terrassamen e de massounarié. Lou dimenche menavo un bèn, un pichot campèstre dins lou quartié dei Vaux, sus la routo de La Bedoulo.

Avié pas ‘gu lou tèms d’ana à l’escolo, se n’en pourtavo pas pus mau... mai... aurié bèn vougu counèisse lei nouvello que leis autre disien èstre dins lei journau.

Quand lei letro arribavon dóu frount, ounte èron sei drole, falié lei faire liegi pèr uno vesino coumplasènto de la carriero de La Tour.

L’oustau èro bèn triste, em’ aquéli tóutei que mancavon.

Souvent vesiéu la boueno vièio regarda aquesto letro qu'èro arribado aièr vo avans aièr, que parlavo dei misèri dóu frount; se countenant de mira aquesto escrituro l’embrassavo enca ‘n còp en esquichant uno lagremo, puei la metié dins uno bouito mounte èron leis autre.

Quand èro plus aqui, qu'èro deforo, alor èro lou vièi que fasié la même coumedio, mai éu plouravo pas... sarravo lei poung.

Un jour que mi trouvàvi aqui, tout pichot de segur, ai ausi aquesto counversacien entre élei:

— Adèlo! acò pòu plus dura! fau que mi croumpes de luneto!

— Eh, o! n’as besoun? li vies plus?

— Noun! mai fau que mi croumpes de luneto!

— Mai mounte voues que ti croumpi de luneto?

— Bè... quand veiras «lou manchot» sus lou cous, mi lei croumparas, voues?

— Va bèn! quouro vèirai lou manchot, ti croumparai tei luneto!

Fau vous dire que de queste tèms s'anavo pas counulta un óculisto. Damo! l'avié 'nca gès de Securita soucialo coume vuèi. Lei gènt si countentavon d'ana sus lou Grandcous. Aqui si li istalavon lei marchand d'óutis, just sus lou dabas dóu cous. E dins sei queisseto en boues (un cóup durbido li servien d'eventàri), l'avié uno chausido e luneto, que sa mounturo èro de fiéu de fèrri, que sei vitro èron ouvalo! tout acò pas pus grand qu'uno pèço de dous sòu. Leis ai visto! m'en souvèni foueço bèn!

Aqueste eventàri èro tengu pèr un pichot bon-ome, manchot, que sa mancho vuido m'impressiounavo tant, qu'èro libro, e que baloutavo à chasque mouvimen de soun proprietàri.

Mounte avié perdu aquéu bras? Bessai à la guerro, éu peréu; mai... queto guerro?... Aquelo de setanto belèu!... es acò de segur... que lou paure èro proun vièi, mi semblavo.

— Adèlo fau que mi croumpes de luneto!

Aquelo preguiero l'ai ausido mai que d'un cóp, e un bèu jour Adèlo diguè:

— Louei, lou marchand de luneto es sus lou cous! l'ai vist en anant cerca lou pan, lei voues toujour tei luneto?

— Pardiéuno, que lei vouèli! despacho-ti d'ana lei cerca!

Adèlo regardavo pas s'èro de 150 vo de 300 que falié! s'óucupavon pas de tout acò, à n'aquesto epoco!

Au bout d'un tèms revenguè 'mé sei luneto dins la pòchi e Louei, li metè sus soun nas.

Pouèdi pas vous dire s'ai foueço rigoula de vèire aquéu gros nas emé de tant pichòtei luneto, vo s'ai agu pòu de vèire d'uei plus gros que semblavon d'uei de poupre. Mai... l'ome urous... èro Louèi!... enfin avié de luneto! Coume lei grands orne! coume lou Conse! Coume lou Barnabo qu'èro lou noutàri! coume lou bouen dóutour Fallen, qu'èro lou mège de la famiho, l'ami deis umble, dounc soun ami à n'éu.

Mai tout acò sufisié pas! Falié faire miés! Falié saupre! Falié liegi alor diguè à Adèlo:

— Adèlo.. aro mi fau lou journau!

— Mai pèr que faire? s'es pèr ana au pàti, l'a tout plen de vièi papié adabas.

— Es pas pèr ana au pàti!

- E pèr que faire, bèu Bouen-Diéu!
- Es pèr lou liegi, pardinche! aro qu'ai de luneto pouedi liegi.
- Creses? tu n'as jamai proun! se l'a qu'acò pèr ti faire plesi, ti vau croumpa lou journau!

La leituro devié èstre interessanto qu'au bout d'un moumen, moun Grand — qu'èro d'eu que n'en pàrli — s'ero endourmi sus sa cadiero, emé soun journau entre seicambo, sei luneto, sa pipò en bouco, sèns muta.

Quand si revihè, Adèlo li faguè:

- Alor soun boueno aquéstei nouvello?
- Oh que nàni! regardo un pau acò: es terriblo aquesto guerro! vouliéu pas ti n'en parla, mai fau que ti fagui vèire! tè regardo!

E lou paure bedigas, moustrè uno «areouplano» (Coume disian alor!) sèns dessus-dessouto. Avié pas vist que lou journau èro à l'envers; alor que presentavo l'aparèi dóu valènt Vedrine après sa tresènco vitòri.

D'an e d'an an passa, despuèi. Mi perdounaras Papet de t'agué un pau galeja? Sàbi que tu tambèn eimaves ta Prouvènço, tu peréu eimaves de rire e s'ères enca' qui de segur voudriés èstre emé nautre, à l'Escandihado pèr rire un bouen cóp! Es pas verai!

LOU COP DÓU BECHARD

Mi souvèni encaro d'uno pichouno aventuro de ma jouinesso e fau que vous la counti.

Ero après la grando guerro, en dès-e-nòu cènt vint pèr èstre mai precis. Fasié long-tèms qu'esperavian la vengudo de moun paire qu'après l'armistice treinavo encaro dins leis espitau, dei sueito de sei blessaduro ei poumoun e perèu pèr lei gaz asfiant. Enfin lou jour venguè e tout rintrè dins l'ordre. Restavo plus qu'a pensa tout lou mau d'aquélei quatre longueis annado pèr lou païs e assaja d'óublida.

Moun paire avié repres en man lou tros de campèstre dei vièii dameisello Jourdan, aquélei que li disien «Jourdan dei panié», de la carriero Rastègue. Estei dameisello

Jourdan èron un pau apparentado à mei rèire-grand e aquéu campèstre, qu'apartenié à n'élei, èro esta de tèms e de tèms entretengu pèr meis ancian e pèr sucessien pèr moun paire.

Or un bèu jour de printèms avian pres d'ouro lou camin de l'Agrié sus la routo de Fenestrello pèr fouire un pau la terro, moun paire e ieu. Avian nouesto biasso pèr roumpre la crousto à miejour. Tre arriba, moun paire la penjè à-n-un óulivié e anè destrauca leis óutis darrié un massis de ginèsto que sentié bon qu'embèumavo. L'avié aqui quauqueis engen pèr jardina: fourco pèr lou femié, magau, palo, rastèu, lichet e dous bechard, l'un gros emé de longuei pivo e sobre-tout un autre, pichot, que Louiso-Babato. I'estrassairis de la routo de Gèmo, avié douna pèr ieu. Ero pas un jouget, tèni de vous precisa, mai bèn un bechardet dóu moudèle pichot. Ai eima aquéu bechard jusqu'au jour que vau vous counta.

Dounc erian equipa pèr uno journado de bouen travai e avié dèz an à-n-aquéu moumen. Si sian avança dóu cantoun dei fraire Bocca, rèire-direitour e creatour dei "Faiençarié-Nouvello" que vuei li dien Proceram. Eron lou paire e l'ounkle dóu grand Dòtour Proufessour especialisto dei maladié d'enfant.

Moun paire entamenè leis oustileta pèr un han! dóu trou de Diéu! e ieu, ai segui. Lou miéu de han! bessai qu'èro pas tant vigourous, es verai, mai avié mes tóutei mei forco dintre, e derrabo la terro! moun paire, à chasque cóp avançavo d'un pas de caire, un pau coume lei favouio, e ieu fasiéu parié. E... han! E... han! E... han! Tèms à autre, moun paire ramassavo un tros d'erbo vo de grame en dessus de la terro que venié de revira e lou jitavo dins uno banasto au caire d'eu e un pau darrié.

A-n-aquéu moumen falié faire atencien e acò ralentissié un pau la cadènçi. Pèr si pas langui e pèrdre l'abitudo, que moun paire eimavo charra, mi racountavo d'istòri de la guerro encaro recènto, de coumbat que li avié participa, d'ataco à la baiouneto, vo l'istòri de la fango dei trencado; acò mi passiounavo, sobre-tout dicho pèr éu.

Mi souveniéu alor, escoulan qu'èri, de la magnifico pouësìo de Vitour Hugo, «Après la bataille». Sabès: «Mon père ce héros au sourire si doux». E belèu qu'au travès de tout acò mi siéu mes à eima Vitour Hugo. Mi semblavo impouossible qu'un ome, fuguèsse moun paire, pousquèsse passa pèr aqui.

Mi doutàvi pas que, vint an plus tard, fariéu pièje qu'eu e qu'à moun tour couneissiriéu l'infèr inuman mounte l'ome es esta rabala au rèng d'uno bèsti e trata enca plus mau qu'elo.

Mai revenen à nouesto istòri. Lou reste fara lou cóp d'un autre conte. Tout en travaiant entendiéu lei brroun dei canoun, lei tacatacata dei mitraiouso e lei vzzoun! deis óubuso, que toutei toumbavon tant e talamen bèn qu'ai un pau endispousa moun paire contro ieu, perqué en tutto naïveta li faguèri:

— Vouèi! mai perqué siés pas mouart, tu?

Crèsi de mi rapela que après un pau cerca, m'a di:

— Bè, bessai que m'an pas vist, tè!

Uno autre bestiso qu'ai facho es quand mi countavo tóutei seis esplé, fa pèr éu soulet. Alor li diguèri:

— Mai estènt qu'as fa tout acò, pèrdequé an moubilisa leis autre, èro pas la peno!

Aqui ai coumprés qu'avié fa uno grosso gafo, perqué l'ai vist à sei gros uei que viravon e viravon. M'a rèn di, bessai perqué deviéu faire ma proumiero coumunioun, mai ai coumprés tambèn que poudiéu, tant, recebre uno boueno counfiermacien sènsò l'acòrdi de l'evesque de Marsiho! Avié la man larjo lou mòustre, e se m'avié empauma, sa man estalado aurié bèn curbi moun mentoun, ma gauto e mounta ei chivu. Alor coume dis l'autre: «Digues plus de bestiso, Marius!» Tout acò avié jita un pau de fre e l'aguè un silènci que seguè. Encaro dous vo tres còp de bechard e moun paire diguè: «Anen bèure un còp.» Beguerian un pau d'aigo à la dourgo e zóu! de nouvèu au travai.

Lei man mi fasien un pau mau ei jounturo (avié que dès an sobre-tout). Mai falié pas faire atencien à n'acò... E... han! E.. han! E... han! à tu à iéu!

Moun paire avié représ lou fiéu de sei narraciein. Aqueste còp èro de Boche qu'avié fa presounié en anant en courvado d'aigo, qu'élei li venien parié querre d'aigo. Aqui me siué raganta à seis uei quand li diguèri:

— Quand leis as fa presounié, as pourta d'aigo à tei coulego, quand meme, dóu moumen qu'ères vengu pèr acò?

— Pardi! que mi faguè, ai di eis Alemand: e sobre tout bouleguès pas. Fau que prèngui d'aigo avans!

Pèr iéu leis Alemand aguèron pòu de moun paire qu'avié la barbo negro; vias, èro un «ippi» avans leis autre, èro un flame farçur!

E... han! E... han! E... han! Dins la terro! Aquesto darriero naracien m'avié embala, m'avié sedu, e mi sarràvi de mai en mai pròchi d'eu, en voulènt rèn perdre d'aquelo istòri. Tèms à autre sentiéu sa man que mi butavo pèr m'aluencha en mi diant:

— Pousoo-ti un pau pichot, que siés trop pròchi. E iéu: han! han! vaqui uno mouto de mens!

A-n-un moumen douna, moun paire mandè un còp de bechard tant grand que n'en fasié de terro pèr rempli tres coufin! Iéu, siué esmeraviha pèr aqueste esplè e vouèli n'en faire autant. Lèvi moun óutis lou plus aut poussihle pèr douna de vanc e wlan! Perqué fauguè-ti qu'à n'aquesle moumen moun paire s'abeissèsse pèr leva 'no racino de grame? Bouen-Diéu! En plen sus la tèsto! Ah d'aquéu crid qu'entendèri! Lei quatre fèrri en l'èr, alounga dins aquesto rego que venié de durbi, lou paure boulegavo plus.

Perdènt tout countourrole de iéu-meme, prenguèri mei cambo à moun couele, e rasclo vers Aubagno! Pinet le l'U.A.V.H., Ladoumègo, Zatoupè, tout acò, de la rigoulado au caire de iéu! Avié fa lou cènt metre en estrassant toui lei record, n'en siué segur, e encaro l'avié de mouto! Es alor qu'entendèri: «Marius! Marius! Arresto-ti!» Ah nàni alor, qu'aquesto voues poudié veni que de l'autre caire de la toumbo! Dous còp repetè: «Marins! Marius!»

Enfiéulèri la carriero Peipagan en pendo, travessèri lei carriero Moussard, Laget e aquelo de la Tourre, mounte èro noueste oustau. Aqui siué ana m'escoundre dins la rèire-remiso, que l'avié aqui d'aragnasso toutei negro dins sei telaragno, e bouleguèri plus en esperant lou moumen de mouri, pèr la moursuro deis aragno vo de la chavano paternalo que devié pas tarda d'arriba, estènt qu'èro pas mouert!

Ma pauro maire avié bèn entendu un reviro-meinàgi que la pouerto avié bacela en si barrant. Elo, cridavo: «Qu's aqui? Mai, qu'es aqui?» E la pouerto se durbiguè de nouèu. Entendèri lei pas lourd de moun paire que mountavo leis escalié e que disié mai calme: «Marius! Marius!»

Iéu de l'entèndre tant pausa, mi siué di: «Pòu plus crida, de segur va mouri, a plus la forço de mounta l'estàgi!» E adaut, dins la cousins, entendèri uno discusien e ma maire que plouravo! Moun paure pichoun! aura 'gu pòu! Ai bèn entendu de brut, tout escas; es bessai éu, mai mounte es ana? «Marius! Marius! Mounto, vène, t'esperan!»

Iéu cercàvi de retarda lou mai poussible la rousto que de segur m'esperavo. Enfin après quàuquei preguiero de ma maire e sobre-tout pèr sei lagremo que poudié pas supourta, ai respoundu: «Siué aqui! — Mai mounte aqui? — Emé leis aragno! — Mai sortes vite d'aqui moun paure pichot! (Lou cantoun deis aragno èro un endré redouta par ma maire, e foueço plus tard ai fa figuro d'eros de li èstre ana soulet, de moun plen agrat, mai aqui es pas la questien!)

Sourtèri de moun trau e m'aprestèri de recebre uno boueno rousto. Moun paire èro rasseta sus uno cadiero em' uno bolo d'aigo e un tros d'estrasso, si fasié de coupresso.

Timidamen li diguèri: «As foueço mau, papa?» Eu mi respondè: «Bè, ti dire que m'as fa de bèn, eisagerarié pulèu.» «Sabès, l'ai pas fa à l'esprès!» « Mai va sàbi que l'as pas fa à l'esprès! Puèi mancarié encaro acò que l'aguèsses fa esprès! Tè, toco-mi un pau acò.»

Oh! queto gibasso! moun bèu, avié tout de la bolo que buviéu moun la lou matin. M'agradavo pas de touca acò, mai alor pas de tout.

— Es egau, que mi fa moun paire, pas manco mi pourta secous! Siés parti coume un fouele!

— Es qu'ai agu pòu de t'agué tua e puei après cridaves tant fouert: Marius! Marius! que pèr lou còp es iéu qu'ai agu pòu d'estre sagata pèr tu se m'agantaves... Puei, à mesuro que courriéu mi siéu di: «Tu moun paire, passo encaro, as fa ja guerro, tu n'as l'abitudo, as la pèu duro, mai iéu, es pas parié!»

À L'ELEITRICITA

Mèste Floriot disié : La verita téen qu'à un fiéu!

Fuguè un tèms qu'avans d'estre l'E.D.F. noste fournissière en eleitricita, s'apelavo... l'Energìo-eleitrico dóu Litourau Mediterranèn. Ero uno soucieta privado.

La soucieta concurrènto èro, se m'en rapèli: l'EIEleitricita dóu Sud-Est.

Puei, tutto l'eleitricita venguè sout lou countourrole de l'estat e fuguè l'E.D.F., eiçi coume dins tutto la Franço. Pèr moun pichot raconte acò a ges d'impourtanci car a gaire chanja dempièi. L'istòri que vau vous counta councerno... l'Energìo Eleitrico dóu Litourau Mediterranèn qu'èro istalado ounte si trobo aro nosto E.D.F., Alèio dei Marrounié.

L'avié aqui uno dougeno d'emplega despièi l'Ingeniaire jusqu'au darrié dei lignard.

Entre èlei si troubavo un Moussu que venié saupre d'ounte? Mai causo seguro èro pas d'eiçi! Pièi èro pas coume leis autre. Toujour bèn propre, lei soulié lusènt de ciro, ùnei braio au ple impecable, foueço elegant, rasa de pròchi, e acò tóutei lei jour de la semano; fino moustacho coume leis American, disien alor. Mai l'avié quaucarèn que lou fasié remarca, quaucarèn que dirai descoustuma eiçi, e es d'acò qu'èro pas coume leis autrei. Sus la tèsto avié un capèu mòu, dei bord releva, alor que sei cambarado avien uno casqueto tout simplamen. (N'i'avié rneme un autre d'emplega, qu'avié un kèpi d'artihié sènsò doute en souveni de la grando- guerro, que venié de feni.)

Perdequé metié un capèu mòu? Vous l'ai di, èro pas d'eiçi. Bessai que dins soun païs, vo dins sa regien de Franço, leis ome porton lou capèu? Bessai que descendié de l'auto soucieta? Dóu pessu? Devié èstre pèr acò d'abord qu'avié lei braio bèn tirado, au ple bèn dre! Lei soulié bèn cira! Mai un autre detai picavo enca mai l'imaginacièn de nàutrei tòutei es qu'anavo au travai em' un mantèu-raglan.

Moun Diéu, lou conse, éu peréu, avié un mantèu-raglan! O, mai Moussu lou Maire anavo pas cava de trau pèr tanca de bigo, eu! Alor qu'en pensas?

Passo encaro de pourta un capèu mòu, mai un mantèu, couquin de sort!... Vo lou tipe èro riche, mai alor perqué travaia à l'eleitricita! Vo alor èro fouele? Pas d'aquélei fouele furious que fau estaca, nàni! Un fouele d'aquélei tranquilas que fan bouqueto eis estello e que farien pas même de mau à n'un lioun.

A tòutei aquestei interrougacièn noun pourrai respoundre. Ai jamai pouscu charra em' éu, pièi, èri foueço joueine. Se vous n'en parli, es que fuguè moun vesin: restavian dins la memo carriero.

Emé leis autrei gandoun de moun àgi, si teisavian quand à l'imprevisto èro tout pròchi de nautre, sènsø que l'aguessian senti veni. (Aqui nous venié un pichot fres dins l'esquino.)

De fes que l'a, lou vesian veni de luen, au cantoun de la carriero que viro. Alor sènsø nous consurta, escapavian en courrènt dins lou plus pròchi courradou. Perdequé erian paurous? Pouèdi pas vous va dire ! Nous avié jamai rèn di, nous avié jamai rèn fa. Nàni, acò èro uno cregnènço naïvo. Nous en impausavo, em' acò pas mai!

Aquel èr soumbrous, aqueste visàgi sevère, renferma! Aqueste capèu! Sei man dins lei pòchi de soun mantèu!

Moun cambarado de toujour, plus vièi que iéu, disié: «Es un espien!» e acò nous gelavo leis esquino. Un autre cop, moun coulego fasié mai: «Es un coumessàri de poulico!» E acò nous fasié encaro plus pòu estènt qu'avian rèn de si reproucha. O! mai vaqui, èro pas acò de tout entandòumens que travaiavo à l'eleitricita!

Ai ausi, mai que d'un cop, de fremo que chuchoutavon entr'èlei: «Boudiéu, que bel ome! Quete biais «Queto prestènçi! Queto diferènçi emé leis ome d'eiçi que sènsø vouguè leis oufensa avien pas de braio au ple «impecable» subretout pas tòutei lei jour, nimai lou mantèu! Parlas d'un afaire!

Pamens quaucarèn es vengu desranja lou roudàgi d'aqueste bounias pèr çò qu'es de sa teletò, es que lou printèms èro aqui e lou Moussu avié toujour soun capèu e soun mantèu. Couquin de bouen souar, acò anavo plus!

Mai qu'avié dins sa tèsto? Garda un mantèu au printèms alor que lei gènt d'eici sourtien la teleto d'estié! e mancavon pas de metre lou capèu de paio; vouèli parla dóu dimenche, naturalamen, que en semano de braio en telo blu sufisien. O! quaukarèn anavo pas, acò cadravo plus!

Lou mès de Mai avié passa, Jun èro bèn entamena, lei païsan coumençavon de daia lou blad, es vous dire que fasié pas fre pèr eiçi! Lou mantèu mi dirès? E bèn lou mantèu èro toujour sus leis espalo de noueste bounias.

Degun avié jamai couneigu d'aventuro galanto à n'aquéu Moussu, pamèns un jour que fuguè un souar l'a'gu de nouvèu souto leis estelo. Coume acò es vengu?

Sieu dins l'ignourènci de vous va dire. Es bessai elo, es bessai éu qu'a afrounta l'autre lou proumié? Va sauprès jamai, perqué l'ai jamai sachu iéu-meme! Mai lou fa èro aqui... Uno fremo l'acoumpagnè à soun oustau, ounte l'avié qu'uno cousins em' uno chambreto.

Crèsi que l'a'gu mai de curiouseta de la part de la poulido fremo que de passien amourouso.

Ero vengudo pèr lou sounda sus seis óurigino! demai lou tipe en valié lou còp, vous va redié: elegant, lisquet, fignolo! Fin finalo èro la chausido! L'endeman sarié fiero de dire: «Es iéu! Aro sabi d'ounte vèn! Aro sabi d'ounte descènde. Degun ausarié li reproucha soun escart de counducho moumentanen. Pièi, après tout, acò la regardavo elo, noun? Devié de comte en degun.

Coume acò à bèn pouscu si debana? Ferman leis iue emé leis auriho, lei secrèt d'arcovo nous regardon pas, puei, vous va dirai pas, na!

Ço que l'a de segur, es que quauquei jour pièi aven agu 'no singuliero esplicacién de soun coumpourtamen vestimentàri.

Aquéu Moussu, ei tra tant sougna, tant pessu, à la fino moustacho à la Errol-Flyn, aquéu Moussu qu'avié un capèu dei bord releva, aquéu Moussu qu'avié un tant bèu mantèu raglan e qu'avié lei soulié tant bèn encira e lei braio au ple bèn estira, aquéu Moussu au mantenemen fièr, èro ni un espien, ni un coumessàri de pouliço. Ero pas de l'auto-soucieta, nimai.

Aqueste Moussu tant elegant, pourtavo un mantèu-raglan perdequé avié un trau à sei braio que fasié vèire lou cuou e lou mantèu li servié à escoudre aquesto misèri, tout simplamen!

Regardas un pau en que tènon lei cavo de cop que l'a!

LOU PICHOT CHIN

Mi souvèni, dins moun jouine tèms, aquelo jouvenço que regretan, d'un fa que n'en fuguèri testimòni.

Vous ai toujour di que mei gènt èron brave, bessai un pau barjaire, mai acò vèn de raço crèsi.

Un jour faudra que vous counti jusquo ount anavo la vantadisso de moun paire e soun oudissèio en Argié, mai vuei, se contentan de resta dins noueste pichot oustau de la basso vilo, aquesto carriero de la Tourre pleno de mei souveni e que represento touto ma jouvènço.

Or, disiéu que mei gènt èron brave, eima de tout lou mounde, fasènt de mau en degun, encaro mèns ei bèsti.

Ai toujour vist de chin vo bèn de gat dins noueste oustau e jamai de ma vido n'ai vist mau-trata un.

Pamens un jour ai vist eiço, e quand li pènsi! O moun Diéu!

Moun paire èro asseta sus sa cadiero, fautuei se voulès, fumavo sa cigaleto, aquelo cigaleto que lou fasié tant tousseja. Legié soun journau bèn tranquilamen.

Iéu èri à moun pichot burèu d'escoulan, fasiéu mei devé d'estudi.

A l'entour de moun paire, cambadejavo un cadèu, pichoto boulo de lano, amusatiéu emé sei patouneto, en aqueste moumen tirassavo uno estrasso qu'avié destraucado souto l'eiguié.

Dins l'oustau l'avié un silènçi quàsi religious. Soulet lou brut dei pajo que moun paire viravo de soun journau, vo bèn, quauquei japado dóu cadèu, venien roumpre aquéu silènçi.

De còp levàvi leis uei, cercant uno responso au proublèmo entrepachous de roubinet, vo bèn de trin que parton d'eiçi à talo ouro, arribon eila à quant ouro? Vias un pau lou tablèu, perqué sias passa d'aqui!

De fes aussi èri distra pèr lei jue de noueste pichot cadèu emé qu auriéu bèn vougu jouga mai moun paire èro proun sevère pèr ço qu'es de la disciplino à respeta.

Tout d'uno l'a agu un silènçi empressiounant, aquéu silènçi èro quasimen descoustuma, lou brut dei pajo s'ausissié plus; ges de pichoto japado dóu cadèu.

Mai de que si passo? Acò devenié intoulerable. Enca 'n còp levèri leis uei e coumprenguèri qu'un dramo anavo si passa. Lou pichot chin anavo faire pissugno! Quand acò arribavo, moun paire avié près l'abitudo, tre que lou cadèu si mancavo, pèr lou castiga, de l'aganta pèr lou coueule e de li metre soun pichot mourre dins sa fauto, tout acò seguènt uno patassolo sus lou cuou.

Aquéu tablèu me penavo foueço chasque cop que si debanavo. Ausi gemi aquesto pichouno bèsti! Que tutto vergougnouso e lou mourre bagna, anavo s'escoundre soutu l'armàri vo bèn soutu l'eiguié,

Es acò qu'anavo si passa sènsa doute.

Eri aqui, barbelant, lou cadèu flechissènt sus sei quatre pato faguè uno pissaloto dins la cousino de dous pan au mèns. D'un bound moun paire si lèvo en enfrouminant lou journau s'apresto à courregi l'insoulènt, mai lou bastard devinant la chavanasso qu'anavo pas manca de li espóussa seis aurihos, d'un soulet còp regardo moun paire e éu meme trempo soun mourre, un còp à drecho un còp à gaucho, drèisso sa pichoto coua en troumpeto e regardo fieramen moun paternau.

Dins soun langàgi de chin, devié li dire: «Ti desrenjes pas moun vièi, es fa, viés, pas besoun de s'encagna!

Vous dirai que moun paire partiguè d'un esclat de rire, talamen fouart que lou chin si metè à japa de joio!

Long-tèms, long-tèms acò a esgaieja nouestei vesprado, poudès va crèire!

Mai quand à vougu va dire à soun entouràgi, dóu poste dei poumpié, fuguè coume toujour, qu'un crid: Aquelo empègo, aquelo pèr eisèmple! Mai es poussible uno causo pariero, à tu ti n'arribara ges d'autre!

Coume voulès èstre cresu après 'cò? Tambèn mi siué proumès de va dire en degun!

LOU CRIME DE LA CARRIERO LAGET

Hòu! meis ami! Venès lèu! vènon de trouba un ome mouart dins un pous.

— Dins un pous? Mounte? Qu's aquéu?

— Va, sàbi pas, mai çò que sàbi es que l'an sagata!

— Diàussi ! fau ana vèire acò!

Es coume acò qu'ai sachu «Lou crime de la carriero Laget».

L'a mai de cinquanto an, la carriero Laget, qu'es toujour fouèço animado, avié dous vièis oustau quasimen en rouino.

Cadun aparteniè à-n-un artisan-maçoun, qu'utilisavo soulamen la remiso pèr estrema soun materiau e seis óutis.

Coume dins tóutei lei remiso l'avié un bassin- lavadou; acò servié au maçoun pèr faire foundre lei pèiro de caus que soun fouèço utilo en maçounarié.

Iéu passàvi tóutei lei jour emé mei cambarado dóu quartié davans aquélei remiso-croto pèr ana à l'escolo.

Chasque còp, regardavian aquéstei taulisso esbrandado que degun entretenié plus, vertadiero rouino e gandoun qu'eiran disian pèr si faire pòu: «Es un oustau trevadis pèr lei masco! pèr lei glàri!»

Dóu moumen qu'erian tóuteis ensèn acò nous fasié rire, mai quouro erian óublij de passa soulet èro pas parié: un pichot fre nous gelavo leis esquino; mai lei souar d'ivèr, acò devenié de l'espavènto quouro la maire nous coumandavo d'ana li cerca quaucarèn à l'especarié dóu caire d'aqui.

Fau saupre que l'avié dous bè de gaz pèr touto la carriero, mai aquélei bè èron ei dous cantoun d'aquesto carriero, çò que fa que lei dous oustau arrouina èron mounte fasié lou mai sourne.

Vo, èro aqui l'ome sagata!

Coume s'èro descubert lou crime?

Fau vous rapela qu'aquestei doues croto, apartenien à dous maçoun diferènt. Un dei dous estènt mouart, longtèms long-tèms sa croto fuguè abandounado.

L'oustau menaçavo rouino mai que mai, em' acò un beau jour leis eiretié la vendèron à-n-un bricoulaire sarraié bèn couneissu dis Aubagnen. Eu esperavo en faire un pichot ataié. Aquel ome li disien Aristido.

La clau de la croto fuguè jamai retroubado. Lou brave Aristido n'en faguè uno à soun biais.

Après mai que d'un assai, parvenguè à durbi esto pouarto: aqui fuguè countènt.

Aristido èro un ome jouïous, galoi, parlant soulet, de còp que l'a cantant; aussi es em' un crid de joio que durbiguè sa pouarto. Lou crid de vitòri aguè lou doun de metre à l'estro doues vo tres coumaire dóu quartié.

L'uno disié: «Brave! Moussu Aristido, li sias arriba, es pas trop lèu!»

L'autro disié: «O, vous, avès pas trop agu de peno, pèr vous faire uno clau!»

Uno autre mai: «Lei gàrri van pas vous manca, despuei qu'es barra eicito!»

E lou brave Aristido tout urous, disié: «Oh pèr eisèmple, l'a uno tino: pourrai faire moun vin!»

La tino en questien èro cavado en foun sour au ras dóu sòu e lou trau tapa d'uno grosso tolo.

Just à n'aquéu moumen, un rai de soulèu dardaiavo sus aquesto tolo barrant lou trau.

Lei bravei coumaire èron toujour à seis èstro

Mai perqué, bèu bouan-Diéu, Aristido diguè aquestei mot: «Aro vau durbi la tino pèr vèire se l'a ges de cadabre dintre!», e disènt acò, dreissè la tolo e lou rai de soulèu anant au founs dóu toumples fa vèire... uno esculeto!

Un juroun! Un crid! La tolo escapo dei man dóu paure Aristido que dins un grand brut recubriguè aquesto macabro descuberto.

Si tenènt la tèsto à dous man, lou paure Aristido sabié plus que dire: «Aquel ome pèr eisèmple, aquelo pèr eisèmple!»

Ero acò que venian d'aprendre sus lei bord d'Uvèuno e que nous faguè courre à si desalena fin d'estre dei proumié badaire.

Poulico, enquisto, parquet, tóutei fuguèron moubilisa.

Lou cadabre fuguè lèu identifica, maugrat qu'aguèsse ges de papié sus éu, un detai tras que rare, bessai lou soulet dins tout Aubagno, lou cadabre avié de soulié vernis!

De soulié vernis, I'avié qu'un ome que pourtavo acò: Doumenico, que rabaiaavo lei bourdiho! Justamen l'avié foueco tèms qu'avié dispareissu, que l'avien plus vist, óublidant même de si faire paga au perctour.

Saupre de mounte arribavo, quouro venguè en Aubagno? Diéu soulet pourrié va saché!

Dins aquéu tèms, si fasié de pichot mouloun ei cantoun dei carriero e Doumenico emé soun toumbarèu, soun chivau e sa grosso palo, fasié lou rabaiage d'aquesto meno, tout soulet. Ero un ome counsciencious dins soun travai. La vilo d'Aubagno èro countènto de soun aquesicien.

Acò es acò, èro bèn éu, au founs de la tino!

De que èro mouart? L'avèn jamai sachu!

Sènso-doute dins uno buvarié qu'èron tóutei empega e que s'èro debanado dins aquestei rouino. An bèn trouha de boutiho vueido, mai tant de tèms avié passa despuei!

Ero sènso famiho, aquest afaire toumbè dins lou noun-rèn.

Mai l'aguè uno espino e pas dei pichoto ! Ero la fraso qu'avié crida Aristido: «Aro vau durbi la tino pèr veire se l'a ges de cadabre dintre!»

La poulico, aprenguè acò! L'a toujour de boueno lengo que faguèron de camin e desfourmèron un pau la fraso que devenguè: «Aro vau durbi la tino pèr vèire se lou cadabre es toujour dintre!» ço qu'es pas parié!

Aristido fuguè castiga mai que mai pèr aquéu mot.

Bèn couneissu deis Aubagnen! Estima entre tóutei, serviable à noun plus, lei proutestaciens favourablos arrihèron sus lei burèu de la couumuno e resoun fuguè rendudo. Lou doursié siguè classa

Naturalamen, Aristido, bandiguè aquest oustau e fuguè que foueço plus tard

qu'aquestei doues rouino si trasformèron en oustau counvenable

L'uno à l'ouro de vuei es óucupado pèr moun coulego Laurèns que vènd de tarraio prouvençalo.

Mai de cinquanto an après, ai agu lou plasi d'ausi lou paire Aristido mi racounta un cop de mai, aquesto aventuro qu 'avié couneissudo e viscudo alor qu'avié dès an en aquéú moumen.

UNO PICHOUNO FOULIÉ

Va sàbi proun, si pau pas tout dire sus nouesto boueno vilo d'Aubagno; pamens l'a uno cavo que fau que vous digui, es d'un cop de foulié que s'es debana l'a foueço tèms d'acò.

Moun paire m'a di qu'avié couneissu aquest afaire e lou paure tipe qu'acò l'èro arriba.

Fuguè un tèms ounte à Aubagno l'avié un Moussu diguèn un pau arlèri, fantasious, mai çò que l'a de segur es qu'avié uno fourtuno couloussalo que sabiè lou moustra à mèntis óucasien. N'en douni la provo: li disien «Lou Richas Bragardissime».

Regrèti foueço d'agué óublida soun noum, mai li fa pas rèn!

Nous fau recounouisse qu'aurié pouscu faire meiour biais de soun drudìgi qu'èro inmènse.

Mi souvèni pas nimai mounte restavo aqueste Moussu, mai, d'après moun paire, avié uno grando bastido qu'aurias di un castelas.

Mai que d'un còp, li prenié la fantasié de crida, de faire de rampèu dins lei carriero d'Aubagno, em' acò lei pàurei gènt lou seguien enjusco au siéu e quand èron tóutei rassembla davans soun èstro, fasié coume Milord l'Arsouillo, dins uno sartan, fasié caufa à noun plus de pèço de mounedo que mandavo dins lou mouloun, coume lou blad e éu s'estrassavo de rire, de vèire aquélei pàurei gus si ròusti lei man pèr aganta quàuei dardeno.

D'àutrei fes, mai d'après moun paire, travessavo tout Aubagno em' un grand atalàgi, talo uno veituro de grandmèstre, e tant-lèu arriba sus lou cours Legrand, ounte aro l'a lou mounumen dei mouart, fasié arresta sei chivau e aqui mai mandavo à tout-vènt de pèço de mounedo.

Lei gènt d'Aubagno, eimavon bèn aquesteis escampadou.

De fes que l'a, acò anave pas toujour bèn.

De mounta sus lou cours Legrand, em' un atalàgi de chivau èro uno cavo defendudo, e arribè mànti fes que lou gardi-campèstre fuguè óublija de verbalisa.

Anes pas crèire qu'acò geinavo lou Moussu, o que nàni! Noun! refusavo jamai de paga lou verbau. Fasié paga soun emendo entre-que recebié l'ordre dóu percetour.

Pamens un jour l'aguè miés encaro que vau lou còp d'èstre counta.

Mounte avié-ti rescountra aquel ome? Quet ome anas mi dire! Un tipe autant fouèle qu'ieu ! Autant tèsto en l'èr e bessai mai qu'ieu! E aquel arlèri èro Anglés.

O, mounte s'èron rescountra? Diéu soulet pourrié vous va dire, iéu va sàbi pas

Sènso doute uno escasènço estraourdinàri li faguè metre en presènço. L'un entèndent parla de l'autre, aguèron qu'un but: Si vèire!

Acò faguè plus lou biais deis Aubagnen, que la boueno aubeno fuguè plus jamai mandado, talo lou: «Je sème à tout vent», car au Larousse. Perqué? Acò venié que nouestei dous refresco-barriero si metèron à faire deis escoumesso lei mai estupido, leis uno que leis autrei. L'un voulié faire mai que l'autre, tant bèn qu'un jour pariguèron de faire un repas dei mai chanu que siègue.

Faguèron pache: Cadun óufririé ço que voudrié. Pleno liberta èro leissado à chascun. Uno souleto règlo: Lou vincèire sarié aquéu qu'aurié paga lou repas lou plus car.

Pèr saupre qu's que debutarié, tirèron à la courtopaio.

Mai pèr la courreicien dóu debana, sounèron lou soulet noutàri d'Aubagno que devié teni lei comte. En espèrant teniè lei dous paio qu'avié alesti.

Lou sort designè l'Anglés d'en proumié.

Demandè un proun grand delai pèr prepara sa chausido.

Pourrai jamai vous dire tout ço que faguè veni dei plus liuenchen païs dóu mounde.

Aro sèmblo rèn d'agué de caviar dóu founs de la Russio vo d'ourchidèo deis Indo, mai carcules un pau, l'a cènt an d'acò l'avié ges d'avioun. Councordo, Caravello e autrei! E lou jour dóu repas arribè.

Uno taulo em' uno touaio en dentello dei mai fino. La veissello en pourcelano de Chino Lei candelabre en or, Lei flour lei mai raro. La chaminèo que brulavo de bouas de sental. Douge servitour en grando-tengudo, pèr n'en servi dous soulamen. (Lou noutàri èro présent mai en jùgi tout simplamen.)

Vous fau gràci de tout ço que si manjè en aqueste repas. Sarié trop long de va dire.

La despènso d'aquéu repas aurié sufì pèr faire manja lei sèt vo vue milo Aubagnen durant dous jour au mèns!

Nouestei dous coumpaire, la pансо bène garnido, fumèron un gros cigare que venié tout dre de la Jamaïco, parlèron de tout e de rèn. L'Anglés mancavo pas de faire ressourtí lei près desproupourciouna qu'avié paga pèr eiço vo acò.

Lou brave Aubagnen n'en pipavo pas uno e risoulejavo dins sa barbo qu'èro espresso. Aussi quouro l'Anglés li diguè:

— Alor moun ami quouro voueste assai de n'en faire autant?

Eu li respoundiguè:

— Bèn se voulès quand aurès feni de digeri voueste repas, vo, quouro voudrés sarai voueste ome! Fissas vous-meme la dato!

L'Anglés pensavo: «Diàussi! lou moustre déu aguè tout fa vèni, d'un caire tant miés!»

Acò faguè pas d'alòngui. Rendès-vous fuguè près vue jour plus tard, à l'oustau de l'Aubagnen e noun à l'oustelarié.

Quand l'Anglés, accoumpagna dóu noutàri arribèron, aguèron la souspresso de vèire lou mestre de l'oustau soulet, sènso varlet, sènso ceremounié, rèn!

Uno taulo simpleto, emé soulamen doues sieto, uno candelo espandissié uno paureto clarta. Uno grando chaminèo en maubre, sènso fue dintre.

Coume l'Anglés s'estounavo d'aquelo soubrieta. l'Aubagnen li diguè:

— Escusas-mi, mai pèr vous óufri aqueste repas mi siéu vis dins l'óubligacién de vèndre mei bèn, meis atalàgi, moun castelas, de remerçia tóutei mei servitour e varlet, aro siéu voueste ome e vau vous paga lou plus car que siegue, voueste repas, coume avèn convengu.

Tant-fa, tant-lèu, prenguè uno grando casseirolo remplido à mié d'aigo, li metè uno dougeno d'iòu e garçè 'cò sus lou trespèd dins la chaminèio.

Emé très bihet de banco de cènt franc abrasa à la can delo meteguè fue à n'uno autre pougnado de bihet souto la casseirolo e ço fasènt alimentavo lou fue pèr pougnado au còp, em' aquelei qu'èron dins la grando valiso à soun caire, mounte èro touto sa fourtuno, e acò enjusco que leis iou fuguèsson dur.

O, Messiés, touto la fourtuno d'aquéu paure fouèle partiguè en fum coume acò!

Lou repas, dei mai frugau bessai, mai de memòri d'ome se n'èro jamai vist de tant ounerosus.

Lou darrié bihet que restavo, serviguè à n'abrama lou cigare de l'Anglés que recouineissè que l'Aubagnen èro lou plus fouart.

Bessai, creirès pas aquesto istòri! Pamens fuguè pas tout!

Leis Aubagnen d'aquéu tèms, fuguèron espanta, càndi, quand veguèron un jour lou paure richas, arrouina pèr agué fa couina douge iou, descèndre dins l'Uvèuno, à la resclauve davans lei lavadou de la vilo e lei bugadiero d'Aubagno, dins l'aigo enjusqu'ei ginous estraire la sablo, lou cremen, que lou founs n'èro curbi.

Aquelo sablo, la passavo au travès d'uno canisso facho dóu cledas d'un vièi galinié, e palo après palo, mandavo la sablo sus la ribo mounte l'avié un relarg sè.

Sabès quant li pagavon aquelo sablo que servirié pèr lei maçoun?

Nàni! Eh bèn vau vous va dire: quaranto sòu lou mètre cùbi!

L'estiéu, couchant dins lei vièis estable de la routo de Gèmo, l'ivèr sus lei four dei fabrico de ceramico, mounte poudié agué mens fre, manjant plus jamai à sa fam, un jour lou troubèron mouart, justamen dins un d'aquélei estable de la routo de Gemo.

Vaqui uno pichoto foulié vengudo un dramo di grand!!!

LOU CAVAIRE DE POUS

Oh! lou marrias qu'èro aquéu drouloun!

Oh! que maufatan que l'avié aqui!

Quand quaucarèn de mau s'èro passa, vite lei plagnènt venien à la carriero de la Tourre.

Quand uno pouarto d'un magasin s'èro durbido subran e que s'èro ausi dindineja la campaneto, gès de doute, èro éu, même s'acò èro pas verai! S'un gat avié disparèissu, zòu! èro mai Tantagno, l'autour de la malafacho e n'en prenié de cóp de boues verd sus leis esquino! Soun paire lou meinajavo gaire e mai que d'un cóp recebè de rousto foueço injusto, acò pouedi vous l'assegura.

Ero pas un sant, es verai!

L'eimavi foueço, èro moun vesin, èro moun einat, èro moun ami ! L'ai toujour couneigu. Quand avèn fa uno bando de carriero, erian aquélei de la Terro-Roujo e de l'Uvèuno e fuguè lou cap naturalamen.

De fès que l'a nous a'gu entreina dins d'aventuro drolo, tau aquelo mounte nous menè rauba de poumo dins lei prat de la Boto, qu'aro es l'estàdi.

Erian vengu de la pichouno routo de Marsiho e nous faguè sauta la muraio en controbas de la routo. Eri proun pichoun à n'aqueste moumen. Lei dous grand, mounteron sus l'aubre e ieu èri adabas, esperàvi que vouguèsson ben m'en manda uno, quand tout d'uno, lei viguèri sauta e parti à la nado dins la Boto qu'èro un bassin prounfouns. Coumpreniéu que quaucarèn anavo pas, mi trouvàvi soulet (acò va cresué aussi!) quand uno grosso patasso m'agantè pèr l'espalo e diguè en mi gançaiant: «Tu au mèns m'escaparas pas!» E ieu vague de ploura: «Maman! Maman, va mi tua aquel ome!»

Deviéu èstre foueço elouquènt dins mei plagnitudo, qu'un moumen d'après, aquéu brave ome anè mi cerca uno escalo pèr mi faire sourti d'ount èri intra.

N'en fuguèri quite pèr la pòu, mai tambèn mi servè de leiçoun, va poudès crèire e partènt d'aqui, ai jamai rauba que que siegue (à part un poutoun d'eiçi, d'eila quand ai

pouscu o quand va poudi. Mai acò es uno autre istòri!)

Ero pas un sant vous l'ai di!

Qu's que l'a pas couneigu?

Pus tard, mi siéu trouba mescla à uno cavo fumadisso.

Erian vengu grand. L'escolo nous avié un pau assena. Lei grandei vacanço èron vengudo e un jour Tantagno mi diguè:

— Mieus, se voues veni travaia ‘mé iéu, deman vau à Sant-Jan, ajuda Janet à cava un pous, vènes emé iéu!

Li siéu ana. Janet èro un brave ome que vivié soulet dóu caire de la Garçaio, qu'es lou quartié de la glèiso d'Aubagno. Aquéu Janet èro renoumena pèr cava vo neteja lei pous.

Tre arriba, coumenço de picouleja sus la terro e ‘m’ uno palo mandavo au pus luen, aquesto terro.

Lou proumié jour nautrei dous, avèn gaire travaia, si pòu pas dire, e lou souar vengu lou trau èro tant founs que vesian plus Janet.

Venguè l'ouro de parti pèr Aubagno.

Après l'agué ajuda à sourti dóu pous, Janet prenguè la precaucion de curbi aquéu trau emé de gròssi plancho fin qu'arribèsse rèn.

L'endeman, la journado fuguè pus duro pèr nautre. Avian istala uno cabro emé tres fusto estacado en formo de trespèd, au mitan de la cabro uno carrello demai uno grosso couardo qu'au bout l'avian estaca un coufin.

Janet au founs dóu pous ramplissié lou coufin e nautre tiravian sus la couardo pèr lou mounta, puèi l'agantavian pèr uno maniho cadun e anavian lou manda sus lou mouloun. Acò èro noueste travai.

Arribavo quauquei còp qu'uno pèiro quitavo lou coufin, que descendie pus lèu qu'èro mountado, alor entendant lou paure Janet que cridavo coumo un voulur: «Esperas un pau! tout aro mounti e veirès se vau vous faire passa lou goust dóu jue!»

E acò mai que d'un còp nous va di e canta.

Vers lou souar, l'avian talamen fa encagna que s'arrestavo pus de brama e nous

proumetié la joio à sa sourtido. Tantagno li respondié à noun plus: «S'es coumo acò s'enanan e vous leissan à voueste trau!» Aqui Janet laisso ana sa coulèro e li proumetè de l'estrangla e de lou pèndre à l'óulivié que nous fasié de l'oumbro.

Rigoulavo plus lou Tantagno! Tirè enca'n còp lou coufin, metè la plancho sus lou trau e diguè: «Janet boueno-nue! es pas vuei que m'estranglaras! Zóu, partèn Mieus!» E ansin faguerian.

Tiras pas peno pèr Janet, es pas mouart d'aquelo! Dous jour après l'escaufestre, un païsan qu'anavo culi d'ambricot, entendeguè 'no voues. Coumo èro pròchi de la capello de Sant-Jan de Garguié, si prenguè pèr Jano-d'Arc e es soulamen que quand ausiguè que lei litanò avien rèn de serafi qu'a coumprès que fau resta sus terro, dóu mens pèr lou moumen.

Lou paure Janet parlavo dóu Bouen-Diéu, mai pas à la façoun deis angi. Es verai qu'acò èro un pau dins seis abitudo à n'éu.

Aro que d'annado an passa, crèsi de mi rapela que vengue plus nous cerca pèr cava de pou!

LEI VENDÈMI DE TANTO FINO

Quand lei vacanço escoulàri toucavon à sa fin, avans de rintra à l'escolo, nous falié faire lei vendèmi de tanto Fino.

Que de joio, pèr nautrei lei galapian de moun tèms!

Si troubavian quàuqueis un: cousin, cousino, grand, pichot, acampa au mas dei Vaux, pèr la Sant-Matiéu de Setèmbre, qu'èro lou jour de la debuto dei vendémi.

Acò èro lou jour sacra e tant luen que mi ramènti, mi viéu toujour arriba tre la pouncho dóu jour, davans la grando bastido.

Ma famiho èron jamai la darrièro e la boueno tanto Fino sabié nous lou dire:

— Aqui la famiho de la goio, vènon lei plus luen de tóutei, mai soun toujour lei proumié coume d'abitudo. acò es bouen signe leis autrei van pas faire d'alongui, en esperant, venès prendre lou cafè.

La boueno tanto dounavo uno grosso bolo à moun paire qu'eimavo lou cafè. Iéu esperàvi em' angouisso lou moumen que mi vuejarié lou miéu, dins la tasso embrecado. Acò mancavo pas : just aquelo que mi fasié pòu! Pèr iéu èro lou plus marrit moumen à passa de ma journado. Lou cafè m'agradavo em' un pau de la (mai la tanto avié ges de cabro). Lou cafè nègre m'agradavo pas, lou troubàvi amar, demai tanto mi metié qu'un gran de sucre, aujàvi pas en demanda un segound tant èri crentous.

Pau-à-cha-pau leis àutrei arribavon e lèu la terrasso èro pleno de mounde.

Tanto Fino nous metié en routo en dounant un panié à-n-aquélei que n'avien ges.

Verificavo que cadun aguèsse soun trenchet pèr coupa lei rapugo e ansin alesti anavian au founs de la prouprieta pèr coumença nouesto obro.

En fènt avans, noun poudiéu m'empacha de coumpta leis andano que si debanavon davans meis uei e que nous faudrié culi. Diéu saup se n'avié!

Au davans de nautre lei grand: ouncle, tanto, cousin, einat discutavon lou cóp. Nàutrei, pèr pas n'en perdre habitudo coumençavian bèn la journado en nous castigant l'un emé l'autre: metènt uno grosso pèiro dins lou panié d'aquéu de davans, vo d'un tros de fenoui li catiga leis auriho enjusqu'à lou faire parti rejougne lei siéu.

Camin, fasènt, erian sus plaço.

Lou miòu, atala à sa carreto basso, èro adeja 'qui, esperavo en manjant sa civado dins lou saquet que pendoulavo à soun coui.

Lei cournudo, èron d'eici-d'eila esparpaiado dins lou relarg. Esperavon lei proumié gran.

Cadun avié sa rego à teni. Nautre, lei pichounet erian douz pèr maiouliero, un d'un caire, un de l'autre.

Tanto Fino nous fasié milanto recoumandacien:

— Pichot! sigués brave, Pichot! vous castigués pas. Pichot! leissés gès de rapugo, tant pichouno sarien. Pichot, se troubas de cacalaus, cridas-mi, mi lei faudra pèr faire l'aiet un d'aquestei jour.

— Vendren lei manja emé vous au mèns, li cridavon leis einat!

De segur! li fasié la tanto

Balin-balan, avian pas lou tèms de si làngui.

Arribavo perfés, d'ausi lou quielamen d'uno chato que cridavo: Noun! noun! puei de crid e de rire.

Coumpreniéu, qu'uno dameisello avié leissa uno rapugo e qu'un de seis amourous l'avié visto e éu, rèn de plus pressa que de li ana esquicha sus lou mourre e fin que rèn si perdèsse, d'ana lou seca emé un poutoun.

L'a quaucarèn qu'ai jamai coumprès, es que quaud m'arribavo d'óublida uno rapugo, I'avié toujour quaucun que venié mi l'esquicha sus lei brigo, mai jamai degun es vengu mi la seca 'm' un poutoun !

Dins la vido, l'a d'aquélei proublemo incoumprensible!

L'avié aussi, perfès de quielamen qu'èron mens galoi: es que soutu uno pampo venien de metre la man sus un nis de guèspo. Acò èro pas parié, poudes mi crèire! Lei counsèu plóuvien: «Touqué pas! derrabo lou dard! pisso-li dessus! acò passara!... Iéu mi pensàvi: Proun que siègue pas sus lei brigo qu'es esta pougnu! sinoun, anan rigoula!

De fes que l'a, èro un autre quielamen, mai aqueste cóp es d'esfrai que venié. — Un paure grapaud assousta à la souco d'uno vigno venié de boulega, fasié de mau en degun, cercavo qu'un pau d'oumbro lou malurous, mai sabès quand sias pas poulit: lei gènt vous garçon de pèiro!

Perfès uno vouas cridavo:

— Pichot! sias bèn en retard, regardas un pau leis autre! Soun au mitan de l'autro andano! Boulegas-vous un pau! Anarèn dina que quouro auren feni. Alor si despachavian que la fam coumençavo de nous gançaia lei tripo.

A n'aqueste moumen regretàvi lei figo d'este matin que nous fasien lingueto sus la draio en venènt dins lei souco à vendemia.

Es en aquélei figo fresco que pensàvi en recebènt lou dardai dóu soulèu. ;

N'avié bèn tasta uno vo doues, pas mai, avien encaro l'eigagnolo dóu matin que semblavo uno perlo.

Ah! lei bèlej journado de Setèmbre! que de souveni dins ma pauro tèsto!

Oublidàvi que dins mens d'un mes mi faudrié reprene lou camin de l'escolo emé lei proublèmo entrepachous de roubinet (mi siéu toujour proumés que s'un jour èri Presidènt de la Republico fariéu aprene acò à n'aquélei que voudrien èstre ploumbié, e

pas mai!)

Tout acò, nous aluncho dóu sujet.

Pau-à-cha-pau, lei vendémi toucavon à sa fin. Lei proumié ajudavon lei darrié, autramen-di lei retardié.

Lou miòu, cubert de susour, avié fa foueço viàgi, venié carga lou darrié. Eu tambèn sentié l'estable toucant. Lei darrièri vigno èron pròchi de la bastido. Ço que nous fasié dreissa lou nas èro la boueno adobo que tanto Fino mancavo pas de metre aquué jour. D'avanço m'en lipàvi lei barjo.

Adounc encaro un esfort, auren lèu feni!

Lei pourtaire avien carga tóutei lei cournudo e vuejavon lei darrièri banasto diretamen sus la carreto.

Lou darrié panié fuguè vueja à soun tour.

Deja la tanto cridavo: «A taulo! A taulo! lei pichoun metès-vous aqui! Adèlo restara ‘mé vous pèr vous servi! Leis ome, bevès lèu lou pastis! que la dobo si rafrèjo!»

Mau-grat que lei galapian erian deforo, sus la terrasso, nous empachavo pas d'ausi lei prepaus galoi dei grand qu'èron dins lou cenadou. Coumpreniéu pas ço que disien, mai devié èstre foueco poulit car èro que de cacalas l'un après l'autre; de segur devien parla de cinema pèr rire ansin. Bessai de Charlot qu'èro à la modo!

Après l'adobo, l'avié toujour un tros de rousti, de froumàgi, puei un pessègue; osco seguro inmancablamen lou panié de rin, mai aqui degun li toucavo, n'avien proun tasta dins lou vignarès.

Puei vesian aparèisse tanto Fino em' uno dourgo à la man, vuejant la mita dóu got de moust en cadun.

Aquué moust que venié just d'èstre esquicha.

Moun Diéu, que goust! èro pas bèn poulit à vèire coume couleur, mai mi semblavo qu'èro de mèu dins ma gargamelo.

Aviéu un pau de repugnanço de sounja que Ravèu avié esquicha lou rin emé lei pèd, mai mi fasiéu un rasounamen que devié s'èstre lava lei pèd avans de cauca!

Sàbi pas s'èro lou soulèu, la fatigo d'agué camina dins lei mouto dóu vignarés, lou bouen dina vo lou tasta dóu moust, toujour es-ti que mi sentiéu sus leis alo d'un àngi; pèr couentro sentiéu plus mei cambo.

Bessai qu'èri un serafin, iéu-meme. Eri en plèn dins lei niéu.

Tout acò a uno fin. Avans la nue, nous fauguè reprene lou camin dóu retour.

Tanto Fino avié garni lou panié de cadun: un emé de rin de pансо-muscado, de l'autre emé de lardado, l'autre mai emé de figo à faire seca pèr Nouvè, perfès meme uno boutiho d'aigo-ardènt pèr lei mau de vèntru, disié!

Ansin finissien aquestei journado autounalo, qu'èron dei plus bellei de ma jouinesso.

L'ASTROUNAUTO

Quand faguerian lou rali aquéu ler de mai 1975, nous fuguè pausa la questien seguènto dins l'envouloupo n° 3. Questien que councernavo Rians, rapelas-vous: «Qu'es l'Astrounauto qu'es nascu dins aquelo ciéutat de Rians?»

Vous dirai pas pèr quànti trabuquet ai passa, fin de trouba aqueste arlèri que degun couneissié.

Pèr la sueito ai sachu que s'èron troumpa sus la questien. Ero un Astrounome e noun un Astrounauto.

Sieu ana vèire lou curat, lou tabaqin, lou casso-chin qu'es lou bedèu, que la vèio s'èro castiga ‘mé la servialo dóu curat e que voulié plus servi la messo d'aquéu fa, mai lou piege pèr lou curat es qu'èro lou bedot qu'avié la clau de la sacrestio e voulié plus la douna! Mai aqui es pas la questien

Cercàvi un Astrounauto e noun leis empacho dóu cutat.

Tout d'uno viguèri uno boueno Mamet, foueço vièio e anèri li demanda.

— Degas-mi, ma boueno Mamet qu's esta l'Astrounauto dóu païs de Rians?

— L'Astrounauto, mai qu'es acò?

— Que vous dire! un Astrounauto es un ome qu'em' uno areoplano, vo un baloun es mounta dins lou cièle.

— Boudiéu, mai perqué aurié fa acò?

— Va sàbi pas iéu un assai belèu!

— Eh bèn! fau èstre fouèle pèr mounta sus d'aquestei engen; aro, se voulès, pouèdi vous dire que iéu, n'en counèissi un d'ome qu'es esta un d'aquélei qu'an mounta lou plus aut dins lou cièle, mai l'es ana d'à pèd! Eici à Rians tout lou mounde lou couneis!

— Boufre! m'en dirés tant!

Eri lèst à li demanda de si purga ‘mé tres gran de maussible (ço qu'en francés li dien d'ellébore), coume dins la lèbre e la tartugo, mai d'abord soun iàgi, augèri pas pèr li evita de la peno.

— E l'es ana d'à pèd, mi dias?

— Voui, Moussu à pèd!

— E mi dias tambèn que lou couneissès!

— De segur que lou couneissi, bord qu'es moun nebout!

— Mai es pas pouossible acò, anen, viguen!

— Voui es pòossible, vous diéu! meme que vèn proun souvènt à Rians, es proun couneissu sabès! que tóutei lou couneisson dins lou païs!

Aqui, èri en trin de mi demanda se fasiéu un pantai d'escouta aquesto brave Mamet que me fasié perdre moun tèms, d'un autre caire mi fasié peno de la contro-dire, d'autant que semblavo èstre de boueno fe, alor li diguèri:

— S'ai bèn coumprès, counèissès un ome ques esta lou plus aut en mountant dins lou cièle, que demai l'es ana d'à pèd, que demai es voueste nebout, que demai es foueço couneissu à Rians, alor pèr plasi, ma boueno Mamet qu'es aquel ome?

— Moun nebout es Gastoun Rebuffat! qu'a fa l'Anapurna en coumpanié de Herzog, Lachenal e sobre-tout dóu grand Liounel Terray!

Mei braveis ami, fau que vous digui qu'ai pas pouscu m'empacha de sarra dins moi bras e de faire un gros poutoun sus caduno dei gauto d'aquesto bravo Mamet, bord que siéu un grand amiratour de Gastoun Rebuffat, à revenje que li fuguèsse à n'éu qu'ouro lou revèirié.

Aquelo proun longo cunversacien, m'avie fa perdre 3 poun, mai n'ai ges de regrès, va poudés crèire!

VINTO-DOUS!

Se disian, vint! acò anarié pas.

Vint-un! nimai.

Vinto-dous! acò mi fa dreissa l'auriho ! Perqué?

Anan assaja d'esplica eiço!

Au jue de loto, si crido: «Lei pouleto!» ço que vau dire: vinto-dous!

Lei marrit garçoun, quand veson la poulico, dison vinto-dous!

Tout acò a bessai un rapport, «pouleto e poulet» es toujour la memo chifro, vinto-dous coume poudès lou remarca!

Bèn, iéu, mi fa souveni quaucarèn!

Despuei de long mes erian presounié de guerro. Après èstre sourti d'espitau, qu'èri esta blessa, après agué passa pèr de camp, d'eiçi-d'eila, fuguèri manda dins un coumandò de travai. Fau que vous n'en dóuni un pau d'esplacien.

Erian louja, à cènt-cinquanto presounié dins un estable. De liè, se poudèn apela 'cò de liè! En tres estàgi, si toucant leis un deis autrei. Aquelei au tresen estàgi, poudié encaro ana, poudien s'assetta, mai leis autrei, èron óublijia de resla acata.

Au mitan de la pèço, l'avié un fournèu que l'ivèr nous dounavon doues brico de tourbo pèr nuech. Tenès comte que fasié mèns de trento vo trento-cinq soutu lou zero.

Ai agu passa d'ivèr, acò vous va jùri, qu'ai agu lou tremoulun très mes de tèms, nuech e jour sènso pousquè m'arresta de tremoula. Mai passèn aqui dessus, se voulès.

Puei, l'avié doues gràndeis taulo en plancho desgroussido e de banc parié.

I'avié pas de plaço pèr tóutei nautre s'assetta.

Lou souar, quand èro l'ouro de la soupo, quàunqueis un avien manja ‘mè sei mèstre (avien pas besoun de s’assetta) d’autrei anavon sus sei liè, qu’èro aqui qu’erian lou miés, puei, après agué avala aquelo marrido soupo, la majo-part fasié parié, anavon sus sei liè.

Pamens, n’avié que maugrat la fatigo, pedassavon sei braio, o sa camié, d’autrei jugavon ei carto, d’autrei mai escrivien, qu de pouësio, aquéu de musico, d’autrei mai fasien lou couiouun, un autre cantavo (pèr pas ploura bessai). Tout acò fasié un brut quàsi infernau.

Es pas acò lou plus marrit! Es qu’avian un capo qu’èro terrible. Eimavo pas lei Françés, si coumprèn, éu meme èro esta blessa sus lou front, dins lou Nord e soun fraire tua dins la Mosello. E, es coume grand blessa que nous l’avien mes coume gardian. Avié un d’aquelei regard que vous jalavo leis esquino!

Quand l’avié uno ouro qu’erian rintra dóu travai, éu venié nous coumta à l’apèu dóu souar. Voulié plus ausi lou mendre brut, lou mendre chut-chut. Nous regardavo souto lou nas, un à un, puei, rejougniè soun poste en nous barrant la pouarto. Après agué encadenassa aquesto pouarto, coupavo lou lume, ço que fa que lou veirian plus enjusqu’au l’endeman au revèi.

Arribavo perfès qu’à la rintrado deis ome, qu’arrihavon pas tóuteis ensèn, leis ùni acoumpagna pèr de sentinelo, d’autrei pèr sei mèstre, acò fasié uno animacien mai que brusissènto. Pensas! s’erian plus vist despuei lou matin. avian foueço causo à si dire!

Tout aquéu bourrin-bourran desranjavo un pau lou moussu; Alor de garapachoun, arribavo pèr faire teisa lou brut. mai tant-lèu vist, qu’un dei nautre cridavo: «Vintodous!» E tout lou mounde avié coumprès. La calamo revenié e éu s’enanavo sènso muta, malurous qu’èro de pas pousquè nous puni.

Acò mai que d’un cóp l’avèn vist! Dirai miés, quant de cóp pèr semano!

Arribè pamens qu’un jour qu’erian mai anima que d’abítudo (discutavian sus lou boumbardamen de Hanovre) degun l’avié ausi intra, degun l’avié vist, tout enmoulouna qu’erian, e tout d’uno, uno vouas de gousié cridè: «Vinto-dous!» Ero aquel espetacle que s’anounçiamo soulet!

Avié remarca que quand venié nous vèire, acò fasié teisa leis ome. Avié degu prendre acò pèr un coumandamen dins l’armado Franceso.

N’avèn foueço rigoula, mai quand fuguè parti, poudès mi crèire!

UN TRATA DE COUSINO

Dins tóutei mei pelegrinacien, ai tasta un pau à tóutei lei mestié.

Ceramisto dins ma jouinesso, bouchounié quand fugueri plus grandet, manobre d'eiçi-d'eila, massoun-peirounié e sobre-tout caufaire routié.

Un jour, alor qu'èri caufaire de mèstre dins un grand oustau au renoum flouri, ai ausi uno causo que fau que vous coûnti.

Dins aquel oustau, erian uno boueno dougeno de servitour: fremo de chambro, nourriço, jardinié, varlet, caufaire de veituro, celarié, e sobre-tout cousinsié e seis ajudo.

Si troubavo qu'aquéu cousinsié venié d'un grand oustau richas e eimavo counta d'istòri que l'èron arribado.

Un jour, après agué fini noueste travai e que lei mèstre èron pas ‘qui, co que nous fasié un pau respira erian entauleja à l'óufiçi, lou cousinsié venguè nous counta ‘quelo:

— Avans de veni eiçi, èri au Comte d'Héricourt, vivié soulet tant avié marrit caratere e charpinous. Avié un biais de manja qu'es pas de crèire, tóutei lei jour que lou Bouan-Diéu fa, à soun menut li falié uno viando frejo courounado de gelatino.

Ero rare que mangèsse fouero de soun oustau, un pau qu'èro gaire frequentadis, mai iéu crèsi qu'èro de pòu que manquèsse sa gelatino.

Aprendren rèn à nouèstei coumpagno en diant que la gelatino que si manjo si fa emé d'ouesse mouèle, en principi de vedèu. Mai pèr óuteni acò fau faire couina d'ouro emé d'ouro.

Or un souar qu'èri en trin de fini d'assousta ma taraio avié beissa moun fue mounte l'avié justamen meis ouesse que fenissien de couina. L'avié pròchi de siès ouro que mitounavon dins l'oulo, èron quasimen cuech.

La pouarto si duerb subran e que ti viéu? lou mèstre en raubo de chambro mi vèn coume ‘cò:

— Avès pancaro fini? Qu'es aquelo vapour dins la cousino? Que fès couina aqui? E senso-mai, destapo l'oulo e vis... d'ouesse que bouièn.

— Ah! nàni! mi fa, vouèli pas que faguès la soupo pèr lou chin!... Avès que de li douna leis ouesse crus! Li fara lei dènt!... Nàni! Vouèli pas d'acò dins moun oustau!

Iéu aviéu pas durbi la bouco, sabiéu proun qu'èro pessuguet e marrit couchaire, jamai aurié coumpres que leis ouesse èron pèr éu.

Tout en amoussant moun fue, mi diguè:

— Prenès vouesto pignato e venes emé iéu!

Que faire quand avès de mèstre ansin? Coumpreniéu que deviéu rèn dire e leissa passa la chavano. Alor agantèri ma marmito e lou seguiguèri.

Sabès ounte m'a mena? Noun! E bèn va vous vau dire... : Au mouloun de femié, voui Moussu. au mouloun de femié! M'a fa vueja la pignato sus lou daut dóu mouloun e pas proun d'acò mi cantavo «Manoun veiçi lou soulèu!», que lou gaz coustavo chièr pèr faire la soupo au chin e mai, e mai, e mai!

Bóufèri pas un mot e m'entournèri dins ma cousino pèr feni d'estrema meis óutis, éu mi diguè «boun souar» e anè si coucha.

Quand fuguèri soulet, sounjàvi: mai deman, d'aquéu pas aurai gès de gelatino! acò fasié plus moun afaire!

Es soulamen quand viguèri qu'avié amouessa soun lume e que devié dourmi qu'anèri mai au mouloun de femié em' uno casseirolo e un cuié em' acò rabaièri lou mai qu ai pouscu aquesto marchandiso.

Ero pas trop pourido! Mai que fau faire? Ero pas de ma fauto, pai! Puei uno fes messo dins lou mouéle après rescaufa si vèirié plus!

Es pas 'cò lou mai, nous diguè lou cousinié, e, coundusien, e que lou chin l'avié tasta lou bastard! e d'un pau m'en leissavo gès!

LA VIHADO AU FOUR

Dins un tèms, Aubagno avié foueço usino que fabricavon de ceramico, dempièi de brico, de maloun, de tèule, de tian, de dourgo, de toupin, de bournèu, sènsou coumpta lei troumpeto de Sant-Jan e lei douiro, pèr leis òli e leis óulivo, e n'en passi foueço.

En aqueste tèms, Aubagno avié un perfum de boues brula qu'embaumavo lei carriero. Acò venié dei feissino que butavon pèr faire caufa lei four.

Aquélei de moun tèms, se rapelon tóutei pèr aguè fa aquéu travai, que l'avié qu'acò coume endustrio e lou païs èro proun flourissènt.

Pièi, vèrs leis annado trento, venguè la marano. Uno à uno, lei fabrico barreron sei pouarto e la chaumo apourtè lou declin d'aquelo endustrìo. Fuguè foueço daumage pèr tout lou mounde.

Mai aqui es pas la questien!

Ço que vouàli vous counta, es uno pichouno charradisso, arribado justamen dins uno d'aquéleis usino, que pèr noueste bounur, marcho encaro vuei, sus la routo de Marsiho.

Vous apprendrai rèn, en vous diant coume si passo lou travai dei ceramisto.

D'en proumié, l'a lei pastaire. Es elei que fan l'argielo dins lei bassin e que s'ócupon de la rintra dins lei pastiero lou moumen vengu. Es pas d'aquélei que vouàli parla. Pièi, l'a lei tournaire, que viron au tour lei bèllei pèço que fan l'ounour d'Aubagno e de la Prouvènço.

Aro lei tour soun eleitri, mai iéu ai vist un parènt dóu paire Barrielle, vira au tour à pèd, uno gerlo d'un metre-trento d'aut. Siéu countènt d'agué vist aqueste travai. L'avié fa en dous cóp, pèr mita, un cóp lou aut, un cóp lou dabas. Pièi acò fuguè racourda sus lou meme tour à pèd. Aquel ome èro Sicard Chalambé.

Pèr faire la souduro éu èro dré sus uno taulo e un autre tournaire viravo lentamen, d'aise. A faugu leissa seca sus plaço, au mens dous jour, avans de pousqué leva dóu tour, e pesavo que noun sai emé soun gros vèntré.

Aquesto gerlo m'a leissa un souveni mau-grat qu'èri foueço jouine. Coumpreniéu qu'èro uno bello obro, digno deis ançian. Ero uno recoustitucien de fàbi, talo que vian dins lei bèu mas vo dis lei Museon Gallo-Rouman.

L'argielo èro espeçialo, mesclado emé de terro refratàri. Sènso-doute que Moussu Barrielle, vouliè óunoura quaucun. L'avèn enfournado quand fuguè lou moumen, naturalamen après èstre estado envernissado, pièi cuecho e enfin sourtido dóu four que faguè l'óunour e l'amiracién de tòutei e sobre-tout dóu tournaire.

Mai mi siéu un pau enrega sus uno draio qu'es pas moun sujet.

Se voulès es pas lei tournaire nimai.

Pamens resto leis àutreis ome, aquélei que fan la bricolo, valènt à dire: lei manobro, leis enfournaire, qu'après faran fue.

Quand touto aquesto ceramico es seco, fau la rintra, l'envernissa, l'enfourna, la faire couina, en fènt fue, nuech e jour. Emé de feissino, fau douna la boucado (i'a souvent quatre bouco) tòutei lei dèz vo quinge minuto. Tout acò pendènt quaranto-vuech-ouro au mèns, pièi fau la sourti de nouvèu dóu four.

Fau coumprendre que leis ome carga d'aquelo obro fasien pas quaranto-ouro pèr semano!

La journado coumençavo à sièis ouro dóu matin en jusqu'à miejo-nuech, pèr leis un, e de miejo-nuech à sièis ouro dóu souar pèr leis àutrei, sènso arrèst, vous l'afourtissi. Naturalamen, lei jour ounte lou four èro alumia, ço que si capitavo un cóp pèr semano au mèns. Leis ome èron d'aquéu fa proun las, perfès.

Dins l'usino que n'en pàrli, l'avié un contro-mèstre proun charpinous, si marfisavo de tout, avié counfisanço en degun, pas meme à n'éu, encaro mèns à sa fremo, m'an di, alor pensas un pau se poudié aguè counfisanço eis ome quand èro pas aqui, éu!

Arribè qu'uno nuech si prenguè de dóutanço, vo bèn, avié fa un marrit pantai, toujour es que subran decidè d'ana vèire seis ome, que dempièi douz jour coumplèt èron davans lei bouco à faire fue.

Pensavo que se tout marchavo bèn poudrié arresta lou fue vers miejour. Ero quattro ouro dóu matin, en mandant encaro vuech-ouro de bouan boues se, l'afaire devrié ana. Es acò que passavo dins sa tèsto, en davalant la carriero de la Republico e en enfiéulant la routo de Marsiho. O, acò devrié ana!

Ero pamens un pau estouna de pas senti lou fum au mèns un còp de la piramido à la

fabrico. Couquin de pas-Diéu! Couquin de bouen-souar! Arribo sus plaço e de garapachoun intrè, d'aise, d'aise e que vist? Lei dous ome, asseta, leis esquino sus lei feissino; un d'un bord, l'autre un pau plus liuen. S'èron endourmi. La fatigo avié agu resoun de sei resistènci! Devié gaire avé de tèms que s'èron endourmi, que lou fue, èro encaro proun vièu. Alor lou Reinard, coume li disien, noun pas de crida coume un voulour, anè à n'un e d'aise, coume un chut-chut, diguè à l'auriho: «Bidel!» Anè à l'autre, e, de la même bassovoues diguè: «Plano!» Revenguè au proumié e d'uno voues un pau mai fouarto: «Bidel!» E à l'autre: «Plano!» Acò mai que d'un cóp e de mai en mai fouart, fin finalo que lei pàureis ome fuguèron sus pèd, coume s'avien agu un ressort souto lou cuou Alor lou Reinard, diguè: «Dourmès encaro doues minuto, aurés perdu doues ouro coume acò!»

E s'enanè tout simpletamen!

L'ERBO DE TRES vo LOU PANTAI EN COULOUR

— Mai es pas pouossible acò, viguen! vas pas mi dire qu'as fa un pantai en coulour!

— E iéu ti diéu de vo ! ai pantaia en coulour que va creses o noun, es coume acò!

— Mai qu'as pantaia de bèu?

— Vè! Ti-va-dire, mi n'en rapèli plus bèn! Eri dins un prat emé d'erbo verdo, mai verdo qu'es justamen aquéu verd que mi fa reveni qu'èro un raive en coulour!

— Dequé fasiés dins aquéu prat? racounto mi.

— Rèn! Regardàvi d'un caire, de l'autre, davans, darrié, e tout d'uno, meis uei s'arrêtèron sus uno superbo erbo de tres que fasié plasi à vèire talamen èro poulido. Chabenço, mi diguèri en mi beissant pèr la culi, e coume mi drèissi, regàrdi lou ciele: justo à-n-aquéu moumen passo un avioun voulant proun bas e, causo que m'a subre-tout estouna, avié doues chifro à chascuno de seis alo. Sus aquelo de gaucho, l'avié 1 e 2, sus d'aquele de drecho lei chifro 3 e 4, ço que fasié: 1, 2, 3, 4, puei mi siué reviha e siés lou proumié qu'ai rescountra despuet.

Aquelo pèr eisèmple! As pantaia en coulour!

Aquesto counversacièn si debanavo lou matin, tre l'aubo, un dijòu passa, sus lei bord d'Uvèuno, entre douz coulègo que restavon dins la memo carriero que iéu.

— Mai es pas lou tout? diguè lou pantaiaire qu'èro un bouen blagaire.

— Ah, que mai! respoundeguè l'entre-parlaire qu'èu aussi eimavo bèn de teni parloto.

— Fau que ti digui que dins ma jouinesso, avièu rescountra uno masco, que m'avié legi dins lei ligno de la man, m'avié predi acò: «Viéu sobre-tout uno grando causo dins ta vido, moun pichot! Plus tard, foueço plus tard, quouro saras un ome, auras uno grossou souspresso! Saras touca pèr de chifro! Acò sara l'evenimen de ta vido! Te recoumàndi particulieramen de pas l'óublida e de faire atencien à çò que t'ai di, pouèdi pas te n'en dire de mai! Fai n'en toun proufié!»

— O! Mai acò mi dis pas çò que vèn faire toun istòri de raive en coulour!

— Ah, nàni! Viés pas? Eh bèn, escouto-mi, ai jamai fa de pantai en coulour, aquesto nuech n'ai fa un, de-mai tróbi uno erbo de tres, puei aquélei chifro 1, 2, 3, 4. Ti dis rèn acò?

— Noun! acò mi dis rèn!

— S'acò ti dis rèn, es que siés un bedigas, un nèsci; iéu, d'aquéu pas vau à l'oustau de la presso, querre moun journau e dóu même tèms prendrai uno biheto de la loutarié naciounalo que finisse pèr 1234, e siéu segur d'aganta lou gros lot!

— Brave! Iéu ti lou souvèti de tout moun couar!

Faguè ansin, emé soun journau soutu lou bras, faruio dins lei paquet de bihet, que venien just d'arriba, ai siguè uno peno perdudo, ges de bihet avien aquestei chifro en finalo.

— Acò's rèn! si diguè noueste ami, vau ana vèire lou Gai dóu tabaquin, qu'es au cantoun de la coumuno, éu duerbe d'ouro lou matin, sarai lou proumié à faire uno chausido!

Eiçi, parié, ges de bihet aguènt aquestei numero.

Que li fa acò! vau vèire lou paire «Chabènço» qu'en Aubagno es l'especialisto dei gros lot! Ai-las! Tres cóp ai-las! N'avié bèn que finissien pèr 12 vo 34, l'avié de 123, de 124, de 231, de 234, mai rèn qu'aguèsson 1234.

Aquelo empego! si diguè lou paure tipe, d'abord qu'es sin, deman anarai à Marsiho, mi fau aquélei bihet!

Tant ba, tant-fa e tant-lèu, descendè à Marsiho emé lou tram e à tout asard, regardavo dins lei barracouno dei journau sus la Canebiero, mai valié-ti la peno de s'arresta?

Viguè l'especialisto dei loutarié sus lou couss Sant Louèi, pamens acandoula aquéú, mai rèn! Toujour rèn!

Dins lei banco de la plaço de la Bourso, faguè chi un cóp de mai.

Cerquè coume accò, touto sa santo journado dóu divèndre, que chascun saup, es un jour de chanço. Fugué mai uno peno perdudo.

Destimbourla, de cóp enrabia pensavo e si disié:

— Auriéu-ti fa aqueste pantai en coulour pèr rèn!

Noun! Acò pòu pas èstre! Es pas poussible! Ai reçaupu un avertimen dóu ciele, n'ai la pressentido! Es quaucaren que sènti! Vo! Va sènti!

Dous grand jour avien passa despuei aquéú pantai.

Sian tout aro Dimenche! Qu'ai di aqui? Dimenche! Dimenche; Es aqui lou rai de flamo! Es accò que mi falié! Es l'esperanço! Perdequé mi dirés? Sabès-bèn que lou Dimenche l'a lou tiercé! e alor vous dis rèn lou tiercé?

Vous afourtissi que sarai pas lou darrié, Dimenche matin, e aqueste còp jougarai lei quatre proumié chivau de la tiero!

L'endeman à l'edicién dei prounousti dóu tiercé lei quatre proumié chivau èron trata de carnasso, de crestén qu'avien ges de chanço d'èstre dins lei dès proumié à l'arribado.

Vai! Pouèdon dire ço que voudran lei prounousticaire dóu journau! Iéu, jougarai ço qu'ai di!

E lou Dimenche matin, pèr passa lou tèms, em' un sourrire que fasié gau de vèire, regardavo en badant l'animacién dóu grand couss, puei dóu marcat agricolo, just en aquelo sesoun, lei ped-terrous venien vèndre lei meloun dóu païs dei Bassaquet, puei, s'entourno mai sus la placeto dóu relògi, esperant que durbiguèsse lou P.M.U.

Tenguè paraulo pèr ço qu'èro de pas èstre lou darrié de faire sa miso sus lei 1.2.3.4, que lou jouguè dous cóp, e tout urous dóu bouen tour qu'anavo jouga eis Aubagnen, prenguè la precaucion de sara sei biheto dins soun portofueio, e sourtiguè en siblant uno

cansouneto, souto lou regard mourgaire deis emplega dóu P.M.U.

Pròchi dóu relògi, un varlet de vilo, ajuda pèr Toumas, lou madur d'Aubagno (1) reglavo la circulacien qu'èro proun fournido en aquesto ouro.

En marchant, éu regardavo acò, aurias di que sourrisié eis àngi tant èro urous.

Perqué fau-ti que just en aqueste moumen, en travessant la carriero, uno veituro qu'uno autre escoundié, lou mandèsse à dès pas plus liuen contro lou trepadou.

Un cóp de siblet, lou varlet de vilo en tant-lèu emé carnet à la man, pròchi lou mouribound, qu'avans de mourri entendeguè Toumas que disié à l'agènt: «Digo-mi! As vist aqueste numerò de veituro, coume es drole! 1234!

UN NOUVÈ D'ESPÈR

Vaqui uno boueno causo de facho, mi diguè moun cambarado! Anan si repauva un moumen. D'un cóp de capèu escoubèri la nèu que restavo sus lou vièi aubre alounga pèr sòu.

Sounjavian eis ouro que venien de s'esvali despuei douz jour.

Erian de presounié de guerro escapa d'un camp, gràci à la coumpliceta d'àutrei cambarado que nous avien ajuda.

Erian escapa d'aquéu camp que nous retenié dempuèi set més, e o, èro acò! Presounié en jùn, milo-nòu-cènt-quaranto erian dins la semano de Nouvé!

Foueço nèu e foueço fre pèr un Marsihés coume iéu!

Enfin avian assaja aquesto aventuro que ten au couar de tóutei lei patrioto: S'ESCAPA!

Lou principau pèr nautre èro de sourti dei tres resau de barbela que l'avié à l'entour pèr nous garda. Tout acò dóumaci la cambaradarié e la fisanço qu'avian ispira à d'ami qu'avien de carto de libro-circulacien dins lou camp. Aquestei carto èron de papié óuficiau deliéura à uno categouriò de travaiadou que s'ócupavon dei chivau deis Aleman que si troubavon dins leis estable fouèro dei douz proumié resau de barbela.

A chasque resau l'avié uno pouarto gardado pèr uno sentinello.

Estei presounié devien sougna lei chivau à cinq ouro dóu matin, li douna la civado e lou fuen, avans que partesson au travai.

Pèr ço faire, lei quàuquei presounie carga d'aquéu presfa se presentavon davans la sentinello en diant: Chivau! après un cóp d'uei sus lou papié, aquéu durbissé la pouarto e falié puei faire parié au segound passàgi.

Lou jour ounte uno evasien èro previsto, falié que lou prepausa au travai dei chivau, prestèsse sa carto au candidat à l'evasien. Si troubavo qu'aquestei carto èron de libro-circulacièn: ana-vèni, ço que fai qu'un autre cambarado d'estable recuperavo autant-lèu lou, vo lei, cartoun e anavo lei rèndre ei vertadié proupiétari, que éli venien tout bounamen reprèndre soun travai.

Naturalamen, tout acò èro bèn ourquestra e devié si passa just au moumen de douz relevo de la gardo. Demai l'ouro matinalo e la coumpliceta de la nuech èro uno ajudo mai que valurouso.

Restavo plus qu'à sauta la muraio d'aquesto vièjo caserno que fasié quatre metre d'autour. Mai aqui l'avié l'escalo deis estable qu'un autre coumpañan avié dreissa contro la paret e que devié leva e remetre en plaço entre lei boto de païo, lou cóp feni.

Es pèr tout acò que falié aguè la fisanço e la coumpliceta dei travaiadou d'estable.

Pèr moun comte, acò fuguè lèu fa.

Crèsi qu'emé la vido de misèri que menavian Dempuei quàuquei mes, tóutei m'avien adouta. Eri, l'amusaire N° Un, èri, lou Marsihés! Quant de cóp avié remounta lou mourau un pau en tóutei!

Tambèn lei quatre cambarado indispensable pèr assegura nosto evasien s'èron oufèrt subran.

Tout acò èro pas à publica, si coumprèn!

Moun coumpañan de despartido èro pas un Marsihés, se n'en manco: èro de Paris, mai aqui es pas la questien.

Vo, es à tout acò que sounjavian sus noste pège, en bricajoulejant douz bescue de guerro e un gran de sucre, qu'acò èro nosto racien pèr teni lou cóp jusqu'à l'endeman miejour.

A la partènço avian previst quatre journado de marcho d'avans d'arriba terro amigo.

Noueste comte avié soun reglamen: quatre bescue, dous sucre pèr jour e pèr cadun! Demai avian uno reservo de tres barro de choucoulant que s'erian proumès de touca qu'en cas de grando feblessò.

Erian au souar de nouesto segoundo journado e prenian noueste repas quatren, avans de passa à l'ataco de la marcho dins lou boues.

O, coumo èro tristo, aquesto fourrèst de la Sarro! Mai mounte anavian toumba?

Marchavian sènsò fin dins un païs oustile à noun-plus! S'aluenchavian dei vilàgi, lou mai que poudian! Bevian l'aigo dins lei gourg vo bèn suçavian de nèu pèr asseda nouesto se!

Aqueste souar, en fin de journado, avian turta uno proun grando bourgado car soun castèu-d'aigo, vist de liuen, avié l'èr impourtant.

Noueste paure repas aguè lèu fa de passa. Lei cambo lourdo d'aquesto marcho escarabouiado e quasimen avuglo dins la nèu, duro la niue, fangouso lou jour, nous avié escagassa mai que mai.

Pamèns falié recoumenca!

Sàbi pas se nous avien vist quand erian pròchi dóu vilàgi, mai avié un pressentimen qu'erian segui.

Sarié-ti acò que li dien lou sieisen sèn?

A man senestro un grand boues nous semoundié soun acuiènco. Diguèri à moun coumpañ:

— Intrèn lèu dins aquesto fourrèst, crèsi que sian plus soulet!

En bèn escoutant, entendeguerian de voues : èro bèn acò, nous cercavon!

Pèr chabènço, lou boués èro fougous. Lou couar batié la chamado e la fatigo si fasié senti. La niue èro vengudo. De tèms à autre s'ausissié un siblet, de cóp à gaucho, de cóp à drecho. Coumprenian que la cassó à l'ome èro duberto! Mai mounte erian, bèu Bouen-Diéu?

Erian mut, pèr pas nous faire signala e pèr espargua noste alen.

Un cóp avèn ausi de voues tant pròchi que si sian tanca dins uno brusquiero e avèn vist à mens d'un metre siès à set parèu de cambo!

Si sian redreissa que quouro leis aguerian plus ausi.

Poudès crèire qu'avèn près la direicien countràri que nous coundugué vers la sourtido dóu boués.

D'ouro avien passa! Erian dins un vilàgi Sarrés, tout pròchi d'uno glèiso. Erian las! Alor diéu à moun coumpan:

— Intren aqui, vène! Eu mi fa: «Mai siés fouèle!» «Nàni que li respoundi... eiçi, degun vendra nous cerca!» E lou carrègi mau-grat éu.

Ansin faguerian. Si trouvian dintre la glèiso e vesian lei clerjoun que preparavon lou Mèstre-Autar.

En s'escoundènt lou mai que podian, tirassàvi moun ami dóu caire dóu banestoun e sènsò mai reflèchi mounterian lei quàuquei marcho de l'escalo, esperant que degun nous cercarié eiçito en aquesto niue de Nouvé. De garapachoun si meterian à ginous dins aquesto gàbi. Degun poudié nous vèire d'adabas.

Un moumen d'après un bourrin-bourran, segui d'un tintourlamen de campaneto anounçiau l'intradò dei fidèu.

Podian rèn vèire, escoundu qu'erian, mai la Santo-Messo poudié pas manca de si debana segound lou rite Crestian.

Un autre cóp de campaneto e lou capelan faguè sa sourtido de la sacrestìo, seguissènt éu-meme uno dougeno de clerjoun. L'entendiguerian saumoudia. Dins moun idèio, seguissié la messo, dóu moumen que noun poudié la vèire, l'ausissiéu

Uno douço calour venènt dei candèlo abrasado emplissié la glèiso entieramen: acò e lou perfum de l'encèns m'enebriavo. Dins aqueste grave moumen, óublidàvi un pau ma fam, moun angouisso e demai qu'èri en païs enemi e qu'erian en guerro.

Lou tèms passavo mau-grat tout!

Eri aqui de mei reflecien, quand tout d'uno, entendeguèri que quaucun mountavo à l'escalo!

Vous lèissi à pensa moun esfrai!

Erian fa coume de gàrri! E s'èro la Gestapo?

Moun Diéu, espagnas-nous d'acò!

Lou capelan agué un sobre-saut en vesènt dous ome à ginous dins sa propo gàbi! Ai cresu qu'anavo crida! Mai, noun! veguèri soun geste de metre un det sus sei labro pèr nous faire silènci, e coumençè soun sermoun Calendau.

Eri pau saberu en lengo téutouno, mai siéu segur que dins sa dicho aura parla de la fraternita deis ome en aquesto niue de Nouvé e aura pas manca de dire que Jèsu avié di: «Eimas-vous leis un leis autrei.»

Nàutrei, aujerian pas boulega, abalausi de ço que nous arribavo.

Soun sermoun feni, après agué manda sa benedicien à sei fidèu, discretamen n'en faguè autant pèr nàutrei dous.

Puei, avans de descèndre dóu banestoun, nous faguè encaro un pichot signe de pas boulega d'eiçito.

Encaro quàuquei cant liturgi e uno darriero benedicien, la grando pouarto fuguè durbido, pau-à-cha-pau l'aguè plus degun dins la glèiso

Lou sacrestan amoussavo lei darrièri candelo. M'èri un pau redreissa dóu moumen que l'avié plus degun e que fasié niue, veguèri que lou curat avié quita seis ournamen sacerdoutau. Lou veguèri que parlavo e que fasié parti lou sacrestan (bessai pèr ana cerca la poulico!), puei, venguè nous cerca.

Sourtiguè pèr uno pichoto pouarto, la pestelè à clau: Erian bel e bèn presounié de nouèu!

Au bout d'un moumen, la clau viro mai dins la sarmaio e lou vièi càpelan arribo em' uno banasto que dintre l'avié: douas gros pan, e douas boutiho de vin dóu Rhin.

Ah! devian agué uno drolo de tèsto en viant acò emé nouèstei mourre brut, nouesto barbo sus lei gauto!

Lou bouen vièi capelan em' un sourrire, nous tendiguè sa banasto d'un èr dei mai afetuous.

Lou miracle de Nouvé pèr nàutrei èro acò!

Vertadieramen nous pourgissié la coumunien, coume Jèsu l'avié pourgido à seis aposto.

Nous fuguè impouossible de li dire: Gramàçi! tant l'emoucien nous sarravo lou qui que d'un grand gèste afetuous que semblavo pèr nàutrei uno darriero benedicien, nous durbiguè la pouarto e dóu det nous mounstrant la fourèst, nous diguè: «Frankreich, is dà!» (La Franco, es pèr aqui!)

LEI ROUTIÉ SOUN SIMPATI ! LOU VIÀGI PÈR BARJÒU

Perqué toujour racounta d'istòri dóu vièi tèms?

Pèr un cóp, vau vous racounta uno istòri arribado l'a quàuquei tèms, tout-bèu-just avans que l'autorouto siguèsse finido, co que fa uno dougeno d'an.

Tout à fes à l'intrado d'Auriou, si trobo aqui un coumèrçi de boues, de manche d'óutis pèr èstre mai précis.

Lou patroun li dien Roubert. Avans d'agué aquéu coumèrçi, Roubert èro routié pèr soun propre comte. Avié sa carto de trasport grand-routo. Lou camioun èro à n'éu. Seis afaire marchavon proun bèn, ma fès! Au moumen que n'en pàrli restavo à La Peno-sus-Uvèuno.

Or un jour dins un relais-routié, eis enviroun de Paris, rescountrè un autre routié que manjavo à la même taulo qu'éu.

Naturalamen liguèron counversacien, coume fan tóutei lei routié, sus lou travai, sus la routo, sus lou fret de sei cargamen; tambèn bessai, un pau sus lei fremo e d'àutrei causo peréu.

Pèr bèn couprendre acò, faudrié èstre esta routié mai, basto!

Decidèron coutrò de si retrouba l'endeman à miejour dins un autre relais à Paris-Bercy.

Tant-di-tant-fa, si retroubèron à l'ouro dicho e l'ome qu'èro un Bretoun, diguè à moun ami:

— Tè ! Pichot! toumbes bèn, dèvi ana dins lou Miejour e sàbi pas mounte si trobo, un païs que li dien Barjòu crèsi e s'acò ti va, ai un viàgi parié pèr tu.

— Penso un pau s'acò mi va! Eri óublij a de faire lou viàgi à vueide pèr ana à Marsiho, avié ges de cargamen avans tres jour e Barjòu counouissi, siéu d'àqui! Osco pichoun siés un ome, anan beure un cóp!

Quand aguèron fini de carga, tóutei dous, reprenguèron la routo, Porto d'Itàli, l'un seguiènt l'autre.

Puei, quand venguè l'ouro de s'arresta pèr soupa, va faguèron au même routié-relais ounte s'èron couneigu e bèu que ti bèuvi, manjo que ti manji, e de nouvéu la routo!

Roubert m'a di: «Veramen avié plus sèt». Es vous dire! Perdequé, Roubert es un bevèire!

Lou Bretoun pren la tèsto dóu couvoi e esquicho lou pignen ! (La nuech es un regàli pèr lei routié, bèlei routo, la vesibleta es boueno, lou moulin viro round, vertadieramen la routo es nouestro!)

Mai, l'a 'gu un mai!

A-n-un moumen douna, uno lampo roujo fa lou balans. Acò vau dire: Arrèst coumplèt, Roubert, qu'èro darrié avié vist de luen lou balans rouge. Demai avié vist lei fue dei fren de soun coumpañ de davans, ralentiguè e s'arrestè tout coume s'èro arresta lou Bretoun. L'a agu quasimen un drame!

De liuen, lou Bretoun avié vist lou balans rouje s'èro arresta coume va sabès.

Ero un countrole de routino, de la gendarmarié.

Lei gendarmo soun bounias emé lei routié. Sabon qu'aquélei an de travai pressa souvènto-fes, alor cercon pas à li roumpre lei basso, mai coume vous l'ai di, èro un countrole de routino.

Voulènt sènso-doute pas mai li faire perdre de tèms, lei gendarmo demandèron au proumié: «Qu'avès dins voueste camioun?» Lou Bretoun partiguè de rire e li fa: «Aquelò pèr eisèmple! Toumbas bèn ! Dins moun camioun, ai plèn de vouestei coulègo.»

— De nouestei coulègo, dins voueste camioun? faguè lou gendarmo aluca! Moustras-nous acò!

E lou bedigas durbiguè lou camioun, èro plèn de pèu de vaco!

S'es pas passa doues minuto entre l'esclat de rire e la messo dei manoto.

Roubert, avié rèn vist d'aquesto scèno, èro toujour darrié qu'esperavo soun tour.

Lei gendarmo s'aprouchèron e li demandèron:

— E vous qu'avès dins voueste camioun? Iéu, ai lou même cargamen qu'aqueù de davans! Zóu! mai lei manoto à n'éu tambèn!

Leis an mena en presoun à Valènço-sus-Rose.

Roubert mi diguè, qu'éu sourtiguè lèu, l'endeman crèsi. Aguè pas trop de peno de dire que sabié pas ço qu'avié di soun coumpañ, mai lou Bretoun fuguè foueço embestia, emé lou moutiéu: Outràgi à la Marescaucié.

Plus tard, Roubert mi diguè mai:

— Iéu crèsi que se mi faguèron sourti tant lèu es que moun camioun èro davans la gendarmarié e sèntié pas lou jaussemin!

INNE À SANT-ANTÒNI!

Dins uno coustiero, procho d'eici, l'avié lou paure Tistè que restavo dins uno vièio bastido que s'arrouinavo. Rouino que dins lou tèms devié agué fa ounour ei bastissèire.

Mai tamben devié l'agué foueço tèms que lei dènt devien plus faire mau ei descendènt d'aquesteis entreprenèire, tant l'oustau èro vièi.

Tistè avié eirita d'aqueù bèn, coume soun paire l'avié eirita dóu siéu.

La bastido èro proun vièio coume vous l'ai di, mai lou bèn èro grand.

De bancau, s'estajant, d'eiçi, d'eila, quàuquei marrits óulivié que fasien mai d'oumbro que d'óulivo.

Aquesto terro, aurié demanda d'estre entre- tengudo em' un bouen coutrié. Bessai aurié rapourta! mai que voulès, Tistè avié qu'un vièi ai pèr entre-teni aquéu bèn ero moudeste, puei... èro soulet! s'èro jamai embarrassa d'uno fremo... alor..., perqué si roumpre la tèsto!

Fasié just un pau d'ourtoulaio, pèr faire boui l'oulo, quàuquei salado, em' acò n'avié proun.

Pamens leis óulivo èron d'un bouen rapport.

Un an dins l'autre si fasié un cinquantenu de litre d'òli.

Sèmblo pas, mai pèr faire cinquanto litre d'òli, falié rabaia au mèns 200 à 250 kilo d'óulivo, ço que fasié 6 à 7 saco, à culi uno à uno.

Leis óulivo uno fes culido, faudrié lei pourta au moulin de Mèste Jaque, que sabès! èro pas davans la pouarto, faudrié faire quàuquei kiloumetre avans de li arriba!

Pèr lei viage ana, acò èro facile, cargarié lei saco sus l'esquino de l'ai, après leis agué estacado sus leis ensàrri, prendrié la draio enjusqu'au camin carretié, passarié lou marrit passàgi, just davans l'ouratòri de Sant-Antòni, puei la routo sarié meiouro fin qu'au moulin.

Puei, quàuquei jour plus tard, anarié cerca l'òli.

Aqui, lou viage sarié pus delicat.

Tistè avié cinq boumbouno, damo-jano, de dès litre caduno, mai sus lei cinq, n'avié tres qu'avien ges de panié, èron despaiado coumpletamen, ges de sagno de prouteicien, ço qu'èro escalabrous pèr lou trasport.

Es un d'aquestei viage que vous vau counta.

Aquest an, la recouerdo fuguè boueno en óulivo.

Tistè, avié rabaia 250 kilo d'óulivo.

Lou jour d'ana cerca l'òli au moulin avié souna

Lou matin, avié bèn estriha soun ai, bord que siguèsse lisquet.

Avié carga sei boumbouno emé suen. Pèr evita lei trantaiado, avié mes de saco vuejo entre-élei e prenguè la routo dóu moulin.

Lou couar en fèsto, óublidè pas de faire lou signe de la crous en passant davans l'ouratòri de Sant-Antòni, faguè enca quauquei pas, puei si ravisant tourna-mai davans Sant-Antòni faguè aquesto preguiero:

— O grand Sant-Antòni! faguès que vuei si debane bèn! vau querre moun òli! faguès que n'en agui fouèço! faguès que moun viage si passe lou miés dóu mounde! que roumpèssi pas de boumbouno en aquéu marrit passàgi e se tout acò si passo sènso varai, au retour vous leissarai un litre d'òli la mai fino qu'aurai!

Sàbi pas se Sant-Antòni a ausi aquesto preguiero, toujour es-ti que Tistè aguè uno bello recouerdo d'òli qu'au moulin li dounèron que lou souar.

Lei moulinié, ajudèron Tistè à carga lou viage sus l'ai. Li diguèron tambèn qu'èron escalabrouso aquestei damo-jano sènso païassoun, de faire d'aise, emé lou marrit camin que menavo à la bastido!

Fin-finalo, Tistè e soun ai reprenguèron la routo.

La nuech, venié à grand pas.

Quand fuguè sus la draio que menavo à l'ouratòri, fasié nue coumpletamen e Tistè pensavo e si disié:

— Bessai que Sant-Antòni douerme à l'ouro qu'es! farai ges de brut en passant, pèr pas lou reviha! dèu èstre las, éu tambèn! e puei acò mi fara espargna un litre d'òli que li avié proumés!

E es coume acò que, l'ai, l'òli e Tistè passèron sènso estampèu davans l'ouratòri.

Mai quand avès ges de chabènço! Avien pas fa vint pas que l'ai s'embrounquè, faguè un faus pas, si cabrè, e, uno boumbouno nuso de paio passè entre lei couardo e venguè s'escagassa sus uno pèiro dins un chafaret dóu tron de Diéu!

Auriéu vougu que viguessias la caro de Tistè!

Si mandè lei man à la tèsto, avié plus ges de péu senoun si lei sarié derraba, acò vous va jùri!

Enrabia à noun plus, s'entourno à l'ouratòri e moustant lou poung au paure Sant-Antòni, li vèn coume acò:

— Ah! siès pas brave tu! viéu que ti n'en fau gaire pèr ti vira lou capèu de caire!

Apoundoun : Leis óulivo, rendon de 15 à 25 litre pèr 100 kilò, acò vario que soun grasso vo nàni. Es un moulinié que me l'a di.

LEI ROUTIÉ SOUN SIMPATI ! UN AUVÀRI

N'en counèissi uno d'istòri qu'es pas deis ourdinàri. Malurousamen à 'gu pèr tiatre un auvàri proun grave. Mai aquesto aventuro a fa nouesto joio dins lei relais-routié que frequentavian. Acò nous a foueço amusa perdequé tóutei avèn couneigu aquéu poumpisto de Sant-Valié-sus-Rose en qu'es arriba l'escaufèstre.

Ad ounc à Sant-Valié, en remountant sus Lioun, i'a un relais-routié foueço impourtant e dei mai chanu pèr leis ome de la routocoume nautre

Aqui sian segur de li bèn manja e acò comto. Aquéu qu'es las, avans de manja, pòu prendre uno boueno doucho pèr si deslassa, li mancara rèn adabas. Aquélei que vouelon dourmi, va pouedon. Lei chambro soun propro, lei linçòu soun blanc e i'a de bouen lié.

De mai, l'impourtant pèr nautre es d'agué un grand pargue pèr metre nouestei barioto à l'abri. Aquéu n'a un de pargue que pòu recebre jusqu'à 30 camioun emé sa remorco, vias, es rèn de va dire!

Pièi, i'a un poste d'essènci e de gasoual que vous diéu qu'acò, aussi es apreçia dei touristo de tout meno, quant ei routié, n'en parlèn pas, tóutei recounèisson aqueste coumplemen de servìci.

Lou poste d'essènci es tengu pèr un emplega que dempièi d'an emé d'an es aqui. Es pèr acò que tout lou mounde lou counouis. Li dien: «Lou Goi», perqué a uno cambo foueço plus courto que l'autro. Quand marcho, semblo que vai de longo toumba. Aquesto bouitesoun li vèn dei counvulsien qu'avié 'gu alor qu'èro encaro dins la bresso.

Un souar, alor que soupavian, proun tard, sus la Naciounalo 7 l'a 'gu un terrible auvàri. Doues veituro de plen fouit si soun pica dedins, encaro pièje l'a 'gu telescoupàgi d'amount e d'avau, malurousamen, coume disié lou bilan, de mouart e foueco blessa.

Au brut dóu telescoupàgi e dei crid dei blessa, la majo-part d'ome que buvien vo bèn que soupavon sourtiguèron lèu pèr pourta secous à n'aquelei que cridavon ajudo Enterin la direicien dóu relais telefounavo à la gendarmarié emai ei servìci de secous.

Sus lei grandei routo, aquésteis auvàri soun quàsi journadié. Lei routié soun jamai lei darrié pèr ajuda; chascun metié la man à la pasto, es lou cóp de va dire.

Assajan de desgaja à cha-pau lei mens blessa dei veituro encabestrado l'uno dins l'autro, assajan tambèn de desgaja la routo qu'èro deja bèn encoubrado. Lei blessa èron estendu de chaque coustat de la routo; lei mens touca l'anavon soulet, vo bèn èron pròchi de ço qu'èro esta sa veituro. Tambèn d'autrei, mens blessa, fasien coume nautre, dounavon la man.

L'avié foueço sang, l'avié de gibo. N'avié qu'avien mau eis esquino, d'autrei avien mau ei couesto, aquéu èro lou bras, l'autre plouravo!

Tout d'un cóp uno ourlado de sereno, seguido dei Pim-Poum deis ambulànçi; lei secous arribavon, lei ambulànçi carguèron lei blessa grave e tout acò partiguè pèr Sant-Valié vo bèn pèr Tain-l'Ermitage. L'avié un dóutour, sus plaço que travaiavo sènso relàmbi.

Lei secous s'èron ourganisa à la lesto. D'autreis ambulànçi venien. Lei proumié secouristo avien vist l'impourtanço de l'auvàri e demanda sènso doute uno plus grando ajudo emé lou talqui

Quand tout rintrè dins l'ordre au mens doues ouro après, que chascun aguè représ sa plaço, leis un à taulo leis autrei au bar, d'autrei mai sa chambro, s'aperceguèron que lou poste d'essènçi èro grand dubert, poumpo libro meme la cagnoto, pestelado es verai, mai la clau èro sus la sarraio au tiradou e tutto la recèto de la journado èro dedins. Mai pas de Goi! Ounte èro passa 'quéu Goi? Boudiéu! Goi! Goi! e cerco lou Goi de tout caire! Lou Goi fuguè introuvable.

L'a bèn quauqu'un que diguè: «Lou Goi, mai adès èro sus la routo, fasié circula lei veituro em' uno estrasso roujo à la man!» Un autre diguè: «Lou Goi? vous faguès pas de marrit sang, I'auran embaucha pèr teni un malaut!» l'a meme un farcejaire que faguè: «Es bessai uno Americano que l'a enleva, aura prouficha de nue pèr faire acò, car es tant bèu e saup tant bèn parla ei fremo! Vai, vous roumpés pas la tèsto, ana lou vèire reveni, noueste brave Goi. Mai lou Goi es pas revengu, pas tout de suito...

Acò s'es passa un dissate au souar, es soulamen lou dilun à vèspre qu'an vist reveni lou Goi. Arribavo eme lou càrri. Sourtié à peno de l'espitau, mounte l'avien mès.

Ero esta embarca de forçò dins uno ambulanço per un secouristo trop zela unencamen perqué l'avié vist bouita afrousamen Lou paure Goi a pas pouscu si defèndre talamen èro enfusca e de mai bretounejavo. Aquest cóp l'avien coupa lou siblet coumpletamen.

L'a 'gu encaro quaucarèn de drole dins tout acò, quaucarèn que despasso l'entendamen, es que douz mès après, recebè la noto à paga au percetour: L'ambulanço e lei frèrs d'espitau! Coume bretounejavo de mai en mai e noun poudènt s'esplica, li faguèron coumprendre que lou miés, pèr éu, èro encaro de paga!

Aqui un pau mai si n'estranglavo, lou paure!



Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti soucian:
3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc - 1999

© Adoubamen dóu tèste : CIEL d'Oc

Courreicioun : Lucian Durand

Meso en pajo e maqueto : Tricò Dupuy

en sa qualita de mèmbre dóu Counsèu d'Amenistracioùn dóu CIEL d'Oc.